

# *JINO JUBA AKYE*

## *KINEMBELO KYAFIKIZHIWA*

 Anweba imanaitu, inge mwakonsha, mukimye kyo twakunyika mitwe yetu nakulomba.

<sup>2</sup> Mutemwe Taata Wamwiulu, tuji bingi nalusekelo bufuku buno pa jije, jishuko jikwabo ja kwiya na kupana ao awama, akukumya Mamboawama a Yesu Kilishitu. Twimusachila Anweba mambo Aye ukijitu pamo keesha, leelo, ne myaka yonse. Twimusachila Anweba pa baabo bantu bapwila kuno mu kimye kya mashika, kabiji baji na byakuketekela bikatampe, babena kutajisha, kasa baketekela mba kintu kimo kya kukumya kisakupewa kwi atweba kufuma kwi Lesa. Twiya nalolo luketekelo, Nkambo, ku mbung'eno yonse. Twimusachila Anweba pa kukwe kupwila, bufuku bukwabo bwajingako, pa tabbanako; twimusachila Anweba pa kupwila kwajinga muno bufuku bwapita, kabiji ne kupwila kwa leelo, pa tabbanako. Tubena kupembelela pe Anweba pa byo mwituntujila bufuku buno.

<sup>3</sup> Taata, twayuka mba muntu yense wakonsha kwendesha maboko abo bakonsha kuzhikula mapeje a Baibolo, bino kujitu Umo Wakonsha kumulengela kwikala Nabumi kabiji waikala wakine, kabiji ao ye Anweba. Kabiji, Taata, tubena kupembelela Anweba kuuba kyokyo bufuku buno. Tupeshai atweba mu misango yonse. Michima yetu yayula bingi na lusekelo pa kumona kimye byo kibena kufwenya pepi kyo tukamukumanya Aye, kilungi ne kilungi, yenka Umo ye twatemwa ne kumwikela bumi pa yonse ye myaka.

<sup>4</sup> Bavula baitabila katataka, Nkambo, balengwa. Byo twayuka mba jibumba jikatampe, foote nangwa fifite, bafwainwa kubatizhiwa mu Jizhina Jenu, mu lukeelo, bafuma mu kupwila kwa bufuku bwapita. Anweba Lesa, twapopwela mutwajijile, twalomba, poso yense Lunkunwa wa kwa Lesa watongwelwa jimo akamone Kyeya kya Mamboawama, ne kutwela mu jitanga.

<sup>5</sup> Twimulomba Anweba bufuku buno amba mwitufye kunyuma ya Kyambo; tumpofolai meso ku bintu bya muntanda, kabiji mwituleke tumone Yesu. Lekai kwikale kyakupitamo kya ku Mutumba Wakwalulwa mukachi ketu, bufuku buno, kyakuuba mba kechi tumonepo muntu ne kanatu Yesu yeka. Twikipuzha mu Jizhina Janji, ne ku lukumo Lwanji kabiji ne kushinikisha kwa Mamboawama Anji. Amena.

Anweba ikalaiko.

<sup>6</sup> Amiwa sakwalula kikye kya kwambilamo, nangwa yuwe desika, pachechetu kumutwala mu mbaji, inge kijitu bulongo, nanchi pakuuba mba Nakonsha kumona mbaji yonse ibiji ya jibumba. Amiwa Naketekela namba nakonsha kwalula bibye bya kwambilamo kuno. Kijitu bulongo, pa kakimye kacheche.

<sup>7</sup> Tubena kupana lwimu, kufuma mwine mu kishimikwa bufuku buno, balunda betu mu Arizona, California, Texas, ne monse mwaya United States, kupichila muteleponi. Akye—akyé kibena kuya ku kyaalo-kyonse, kuno kupwila bufuku buno, kupichila muteleponi, nanchi twaketekela mba Lesa usa kwitupesha.

<sup>8</sup> Mwakonsha kumvwa, kunyuma kokwa ku—ku lubaji lwa kipiko lwa kishimikwa nyi? Kijitu bulongo, babena kuya na kupalanguzha mitanchi ya telefoni, mu kumona kana ibena kwingilatu bulongo.

<sup>9</sup> Muntu yense uji nalusekelo bufuku buno nyi? [Kipwiyo kyaamba mba, “Amena.”—Waku.] Naamba mba, kyawama! Ku *lulwe* lubaji? [“Amena.”] Amen. Njibingi na lusekelo pa kumona mba anweba bonse mwaikala bulongo.

<sup>10</sup> Kabiji keesha bufuku, inge mabumba atwajijila na kuvula, bakanungakana nateleponi. Byonka byokiji bufuku buno. Naketekela mba bambo baji kokwa ku tabbanako.

<sup>11</sup> Kabiji, keesha lukeelo, mpwijilo kechi yakonsha kwikajila pa tabbanako ne, mambo...kukekala sendwe wamaluba na kuwamisha kipwiyo na mambo akiijilo kya masongola keesha mute. Kabiji bapipula kimye kya—kya kupwila, mu lukeelo, ku kipwiyo kya Mulongo Ruddell, umo wabalunda netu, kabiji kokwa ku—ku mukwakwa wa, 62. Kyabijikwa nyi? [Mulongo Neville waamba mba, “Ee.”—Waku.] Kyabijikwa. Kabiji, inge kyayula bashalapo, tukatola bashalapo ne kwibatuma ku wamwingilo mukwabo kokwa kukifulo kya kwa Mulongo Junior Jackson, ku Clarksville. Ene mambo kyotwabikile pa kifulo kya kwa Mulongo Ruddell, paipipa na kuno, kabiji twakonsha... . kabiji twalangulukile mba kyapela kutanapo. Kabiji pano atweba tusakuyuka byakuuba mu musango mukwabo. Kabiji mumone mba lonse lubatizhilo lukekaleko keesha, kabiji Naketekela mba kukekala bakwabo aduleendi umo nangwa tuu banungwako ku lubatizhilo keesha. Kabiji pano keesha bufuku... .

<sup>12</sup> Amiwa kechi natemwa kubijikila jimo kintu kya kwambapo kiji kulutwe ne, bino bufuku bumo kupwila kumo, nangwa juba jimo, Amiwa mbena kusaka kwamba pa mutwe wa: *Ye Ng’anyi Awe Milekizedeki?* Mambo, ke—ke mutwe ye Naketekela mba tubena kwikala mu kimye alwe lumwekesho, ajo jaikala jipuzho mu mankulo onse, ja kuuba mba, “*Ye ng’anyi awe Mulongo?*” Kabiji Naketekela mba Lesa uji na mukumbu, Aye

byo Ajinga. Bamo baambile mba, “bung’anga,” bamo baambile mba, “mfumu,” bamo... Bino kuji... .

<sup>13</sup> Kikulutu kuji jipuzho, kwafwainwa kwikala mukumbu ku jojo jipuzho, waitabilwa. Kechi kwakonsha kwikala jipuzho kwakubula mukumbu patanshi ne.

<sup>14</sup> Pano, twaketekela mba Lesa usa kwitupa mapesho bufuku buno kufuma mu Kyambo Kyanji, byo tubena Kwikitanga.

<sup>15</sup> Kabiji mwajinga na... Billy wambujile mba ne mubuule mba mwajinga bingi na lumvwang’ano lwawama na bantu kuno abo bajinga ku mutanchi wakutula myotoka, ba kapokola ne bintu byonse. Twajijilai; akye kiji bingi, kyawama bingi.

<sup>16</sup> Twaketekela kumonapo kimye, kapepo mu kimye kya palutwe, apo potwafwainwa kuleta tente muno mu muzhi ne kumubika kukwe ku kibaza kyakukailamo bisela, ako ko twafwainwa kwikala kimye kyabayako, kapepo isatu nangwa milungu foolo, ya kusangululwa, kutwajijilatu. Kabiji kuno tufikatu pa kwiyuka umo ne mukwabo, kabiji ne kwamba mba-shalaipo kabiji twabwela twaya ne jikwabo. Pakuuba Nafwainwa kwiya na kwikala lwendo lwabaya, pa kimye kimo po twafwainwa kwikala kwakubula kushika bufuku bumo nangwa bubiji, pakuuba mba twaikalatu na kufunjisha, mute ne bufuku, mute ne bufuku, na kuyatu na kuyatu. Kapepo muntu umo waya ku nzubo na kujisha banzolo, bang’ombe ba mukaka, kabiji wabwela mulungu walondelapo kabiji ne kutwajijila na kupwila. Na—Natemwa kyokyo. Nanchi aye Nkambo ekale ne anweba.

<sup>17</sup> Pano, Amiwa kasa kyangye kuya ne, kapepo Pamulungu lukeelo nangwa Pamulungu bufuku, nangwa kimye kimo, mu kupwila kumo, Nayuka mba anweba bonse mubena kupembelela kumvwa Mbila pa Bukine bwa *Masongola Ne Kwikana*, akyo kiji lo lukatazho lumo lwa kimye. Kabiji Amiwa kine naketekela byonka byo Naimana pano, Naketekela mba mukumbu walumbuluka uji mu Kyambo kya Lesa, kabiji Naketekela mba akyo kyo Nalaile kuuba pa kubwela jibiji.

<sup>18</sup> Kabiji Naketekela, byo nayuka, nobe byonka byo Nayuka, Nasaka kwikala na kupwila kukwabo muno mu Jeffersonville, pa Mulungu wa Lusanguko, kabiji atweba... kupwila kwa kusama kwa juba, kabiji pano ne Mulungu Walusanguko. Nanchi tukabijika palutwe kabiji ne kweseka kukeba kibaza, inge kya konsheka, nangwa kuntu kumo, Pamulungu, kapepo kwiya Pakibelushi ne Pamulungu. Bafwainwa kwiya na ndeke ne kubwela, mambo ke pepi na kimye... Nafwainwa kwikimona, patanshi, na mutanchi ye Njinaji, kabiji lomo lwami—lwami—lwami lwendo lwa kuya ku California. Kabiji pano, kupwishatu kyokya, Nafwainwa kuya ku—ku Africa. Nanchi tukwatakane kabiji mwitulombeshepo.

<sup>19</sup> Pano, bufuku buno, Nasaka kwita milanguluko yenu pa kibese kya Kyambo kya Lesa, kitanwa mu kyapitala kyabu 4 kya Luka Wazhila. Kyapitala kyabu 4 kabiji ne veeleshi wabu 16, kyatatwila pe, Yesu byo abena kwamba.

*...Jino juba akye Kyambo kyafikizhawa mu matwi enu.*

<sup>20</sup> Pano twakeba kufumya, kufumya mu Kyokyo, mukupezhako kwa nyngijilo ya Kyambo kya Lesa! Pano, atweba twakonsha kumona bintu byo byabikwa, pakuuba kisenda Bulume pakuuba mba Kingile.

<sup>21</sup> Twakonsha kumona bintu byo byabikwa ku mashinyi, a motoka, bino kisenda bulume pakuuba mba mawilo engile ne kwenda.

<sup>22</sup> Bino, Yesu wabwelele ku—ku Nazala, ako Aye ko ankomejile. Kuya kulutwe mu Binembelo papo, twatana baambile mba, “Twaumvwa mba Obewa waubile *kikananga-ne-kikananga* akwa ku Kapenama. Pano tukumone Obewa wikyuube mu kyaalo Kyobe Obewa mwine.”

<sup>23</sup> Yesu waambile mba, “Aye—aye ngauzhi kechi wikala na munema mu kyaalo kyanji mwine ne.” Kabiji, mambo, iko ko wakomena, kabiji iko bantu kobakuyuka. Kabiji kokwa Aye wajinga na—na—na jizhina jatama, kya kutatwilapotu, Aye pakusemwa kwakubula shanji wa pantanda. Abo bamutelele Aye amba “mwaana wa mubukende,” kyakuuba mba Maliya waimichile kasa akyangye kusongolwa, palutunanwa kwi, Yosefwa. Bino, akyo kechi byokiji ne, twayuka mba kechi byo kiji ne.

<sup>24</sup> Kabiji pa kikye Kinembelo, kyalengejile meso ami kuya pa kikye, ke kintu kimo kyamwekele ku Phoenix katataka, Arizona. Kyajinga pa juba japelako, ja kupwila jo Nafwajilwe kusapwila Kumbung’eno Yabyaalo byonse ya ba Full Gospel Business Men.

<sup>25</sup> Kabiji mu iye mbung’neno mwajinga mwenyi ye twajinga nanji, ao wajinga bishopu wa ku Katolika, ao wajinga wa—wa ba “Kisho kya Benakelondiya kya ba Apostolic Catholic church; Aye Rev. John S. Stanley, O.S.D.” Aye ke “akibishopo wa bametulopolitani mu United States,” mu kipwilo kya Katolika. *Akye* kyajinga kitupa kyanji kabiji ne—ne keyala wanji.

<sup>26</sup> Kabiji wajinga mwenyi ku Christian Business Men, kabiji Namumwene kokwa, juba ja kunyuma. Kabiji byo Nasapwajilenga Pakibelushi bufuku, Naketekela byo kyajinga, nangwa Pakibelushi lukeelo pa kajo kakwiaula, kabiji Amiwa... Nobe byo Naambilenga, aye watwajijiletu nankutala. Nalangulukile mba, “Awa muntu kine ubena kukanatu bintu byonse byo Mbena kwamba.” Kabiji, mwayukatu, mwakonsha—mwakoshatu kumumona; aye watwajilenga mutwe wanji peulu-ne-panshi, bino Amiwa kechi nayukile kine kintu kyaingijilenga mwi aye ne.

<sup>27</sup> Nanchi Pamulungu mabaanga, byo Naimene na kusapwila, Nasendelenga mutwe wami pa *Bisaso bya Lusemo*, apo Yesu po aambile, mba, “Byonka mwanamukazhi byo omvwa bisaso bya mwaana,” ne akyo kiji mu bisaso byalusemo. Kabiji nanchi Naambilenga ponkapa, nobe, *Bisaso bya Lusemo*, mutwe, na kwamba mba ntanda iji mu bisaso byalusemo pakino kimye. Yakala yafwainwa kufumishiwapo, pakuuba mba yakatataka yakonsha kusemwa; nobe byonka—lunkunwa byo afwainwa kubola, pakuuba mba alupule bumi bupya.

<sup>28</sup> Kabiji bisaso, bisaso byo byafikijile ntanda! Mu Nkondo Itanshi Yantanda yonse, yajinga na misongo ikatampe, mambo bajinga na luya lwa bulembe, ne bintutu bikwabo, abyo byakonsha konauna ntanda. Kabiji mu Nkondo Yabubiji ya Ntanda yonse, yafikijilwe na ikwabo, misongo yatachisha; bajinga na mambomba, kabiji ne mbomba wa atomiki. Akyo kechi kyakonsha kufikilwa na misongo ikwabo ne. Naao ma mizailo ne bintu bijiko leelo, imotu nkondo yakonsha kumuselakanya kufuma mulwelele, mambo kechi kyakonsha kupuluka ne. Kabiji kukekala ntanda ipya. Aye Baibolo waamba mba byokikekala.

<sup>29</sup> Mwaila Mbila yonse yafumine kwi ngauzhi, Isalela watambwile bisaso byalusemo, mambo akuuba mba abo bangauzhi baishile pa kyonka kya kimye panyuma ya bafunda masukuulu a mamboawama ne basapwishi bakatwala kipwilo kyonse mu musango wa kabungwe. Kabiji bangauzhi byo baishile pa kyokya kimye na ABYO BYOBYAAMBA AYE NKAMBO, bebisukenye bipwilo, kabiji byajinga na bisaso byalusemo. Pakupezhako, kyajinga na bisaso byalusemo kufikatu ku kimye kyo asemene Mwaana wamulume wa Mamboawama, ao wajinga Kyambo Akyokane kyaalukile ke muntu.

<sup>30</sup> Nanchi kipwilo kine kiji mu bisaso byalusemo bufuku buno, ne jikwabo, na mambo a kusema Mwaana, Mwaana wa Lesa wafwainwa kwiya jibiji. Bonse bafunda masukuulu a mamboawama, mitanchi yetu yonse, onse madinominesheni, byabola ne atweba bene. Nanchi atweba tuji mu bisaso byalusemo, kabiji Mbila ifuma kwi Lesa kimye kyonse itwala kipwilo mu misongo ikatampe, bino pakupitapo kakimye ukasema Musongwa. Akyo kikaleta Yesu Kilishitu ku Musongwa Wanji.

<sup>31</sup> Kabiji, nanchi, byo nalangulukilenga mba awe muntu ubena kukana bingi. Byo Naimene amba sapwile iye Mbila, Nazhikwile mu Baibolo wami, amba ntane peji.

<sup>32</sup> Kabiji mukazhi wami popo apeletu Baibolo wakatataka, wa Kimishimishi. Baibolo Wami wakala waikala myaka pepi nobe fifitiini, kabiji wajingatu watabauka bipimvwa bipimvwa. Mapeje, kimye kyonse inge washikuka, ke kulelaukamo.

Kabiji, bino Nayukile kwakutaina Kinembelo kyonse, nanchi Amiwa tanga bingi bulongo mu yewa Baibolo. Kabiji Natolele wakatataka, mambo mukwabo wamwekele kutabauka bingi, kuya nanji ku kipwilo.

<sup>33</sup> Kabiji byo Natatwile kuzhikula mu Yoano Wazhila, apo patanwa Kinembelo, Natatwile kutaanga kyapitala kyabu 16, kabiji veeleshi ye Nakebelenga kechi wamwekele ne. Nanchi Nalangulukile mba, “Ke kyenyi!” Nabwelele jibiji; nangwa byonkabyo kechi wamwekele ne.

<sup>34</sup> Kabiji Mulongo Jack Moore, kufuma ku Shreveport, Louisiana, mulunda mutemwe nami, waikeli byobya. Naambile namba, “Mulongo Jack, akyo kechi kitanwa mu Yoano Wazhila 16 nenyi?”

Aye waambile mba, “Ee.”

<sup>35</sup> Kabiji awe pulisiti wa ku Katolika waimene kufuma pa kipona kyanji, mukachi ka basapwishi pepi nobe aduleendi baikele ku pulatifomu; waendele kwiya pepi kwi amiwa, na yonse mikukumba yanji ne mikangyo ne misalabu, kabiji ne bikwabotu, kabiji waishile kwipi ne amiwa. Kabiji aye waambile mba, “Mwaana wami, ikala watekanya. Lesa ubena kukeba kwenda.”

Nalangulukile mba, “Waku Katolika bishopu nkumbula kyokyo?”

Aye waambile mba, “Kitange kufuma mu Buuku wami.”

<sup>36</sup> Kabiji Natangile Kinembelo kufuma mu Buuku wanji, natolele kibaaba kyami kabiji naile kulutwe, nasapwijile byambo byami.

<sup>37</sup> Palutwe, byo Napwisheshe, aye waimene byo Nafumineko naya, kabiji waambile mba, “Kuji kintu kimo kyafwainwa kumweka. Panyuma ya kyokyo, kipwilo kyafwainwa kufuma mu kulubakanya mo kiji, nangwa atweba twafwainwa kufuma mu kulubakanya kipwilo mo kiji.” Nanchi, kimo nangwa kikwabo.

<sup>38</sup> Kabiji Amiwa naile ku nzubo, kubwela ku Tucson, aa mabaanga bufuku. Baana bajijilenga tubashinkwa, kabiji Naimene mba mpote tubashinkwa pa kitala kyakicheche. Kabiji mukazhi wami waambile mba, “Bill, Amiwa kechi nakikalapo na lubazhibazhi lwa musango yewa mu bumi bwami bonse ne, pa kukumona obewa kasa waimana byobya nakuzakama na Baibolo.” Waambile mba, “Bushe kechi kya kukulengela kuzakama nenyi?”

<sup>39</sup> Naambile mba, “Ine.” Naambile mba, “Nayukile mba kiji monka kutu kumo. Kechi mwajinga yuwe peji ne. Kechi kyanembwatu bulomgo ne.”

<sup>40</sup> Kabiji aye waambile mba, “Byo nalangulukile, mba Yami napotele yewa Baibolo! Kyamwekele nobe jiso jonse jajinga momwa jatajilengatu pe amiwa.”

<sup>41</sup> Kabiji Naambile mba, “Kyawama, obewa kafwako kyo wakonsha kuuba ne. Akwa kwajinga kubula kunembwatu bulongo kwa Baibolo.” Naambile mba, “Abo kechi babikilemo yewa peji ne.”

<sup>42</sup> Kyawama, Naikele pansi ne kutalamo jibiji, kyajingatu bulongo byonka byo kyafwainwa kwikalala; pakuuba kyapitala kyabu 16 kyapelako, na kibaaba, kibaaba kyakyo kijitu pepi nobe maichezi asatu kufuma pansi, kuya pa kyapitala kyabu 17 kulubaji lukwabo, kyaubatu kintu kimo. Kabiji, byo aji Baibolo wakatataka, aa mapeji abiji kine ekwachile pamo, kabiji Natangilenga kufuma mu kyapitala kyabu 17 mukifulo kyabu 16. “Kyawama,” Naambile mba, “akyo kijitu bulongo. Ke mambotu a kintu kimo.”

<sup>43</sup> Kabiji kijitu pamo byonka byo wakonsha kumvwa jiwi jiji jonse, Jiwi jaishile kwi amiwa, ne kwaamba mba, “Aye watwelele mu Nazala, konka Aye ko akomejile; kabiji watwelele mushinagoga, byonka byo Aubanga kimye kyonse. Kabiji Aye pulisiti wamupele Binembelo bya kutanga, kabiji Aye watangile Isaya 61. Kabiji Aye byo atangile Binembelo, Aye waikelle pansi; wamupaine jibiji Baibolo kwi pulisiti, awa Buuku, kabiji waikelle pansi. Kabiji meso onse a kipwilo ajingatu pe Aye. Kabiji Byambo byawama byafuminenga pa kanwa Kanji. Kabiji Aye waambile mba, “Jino juba akye Kinembelo kyafikizhiwa.””

“Jino juba akye Kinembelo kyafikizhiwa.”

<sup>44</sup> Kinembelo kyafikilamotu bulongo! Inge mwakonsha kumona kikye mu Isaya 61:1 kufika pa 2, ipo Nkambo yetu poatangilenga, Isaya 61:1 kufika pa 2. Bino pakachi ka veeleshi wabu 2 wa Isaya 61, Aye waimene. Apo po kyaamba mba, “Aye Mupashi wa Nkambo uji pe Amiwa; mu kusapwila mwaka waitabilwa,” apo Aye waimene. Kika? Lubaji lukwabo, lwakuleta luzhachisho, kechi kyajinga kya kwiya Kwanji kutanshi ne, pakuuba Kwiya Kwanji kwa bubiji. Monai, kechi kyajinga kya kyokya kimye ne. Binembelo kechi byuba bilubo ne! Kimye kyonse bikalatu byalumbuluka. Yesu waimene ponka Kinembelo po kyapelejile, mambo akya kyajinga kyafwainwa kubiwa mu juba Janji, pano, mu kwiya kwanji kutanshi. Kwanji Kwiya kwabubiji Aye ukaleta buchibishi bwamambo panopantanda; pakuuba kechi mu kyokya kimye ne. Aye wajinga “wakusapwila mwaka waitabilwa.””

<sup>45</sup> Monai Mesiyasa waimene mu pulatifomu, na kwimwesha Ayemwine na Kyambo kya mulaye kya yoya nkulo. Kyajinga bingi kyenyi, Mesiyasa kwimana ku meso a kipwilo! Kabiji monai bibye Byambo byawama, byo Aamba papo, “Kusapwila mwaka waitabilwa.”

<sup>46</sup> “Mwaka waitabilwa,” byo twayuka atweba bonse, nobe batanga Baibolo, kyajinga “mwaka wa yubili.” Kyakuuba mba, bonse bazha ne bakaili, byo bajinga, batwajilwe, mukaleya;

kabiji bapaine ku mwana wamulume, pa kulipila kongole; nangwa mwana wamukazhi, pa kulipila kongole, [Kafwapo kiji pa tepu ne—Waku.] kabiji bajinga mubuzha. Nangwatu babandemo byepi mu buzha, nangwa bafwainwa kwikalamo bimye byalepa byepi; inge mwaka wafika, wa yubili, inge ntolopita yavuma, muntu yense wafwainwa kukasuluka inge wakeba kukasuluka. [Kafwapo kijipo pa tepu ne.] Obewa wakasuluka. Obewa kechi ukiji muzha ne.

<sup>47</sup> Pakuuba inge wakeba kutwajjila kwikala muzha, obewa bafwainwa kukutwala ku tepo, ne kwimikwa ku jishiki ja tepo, ne kutoola mungele ne kusaba kipeze ku kutwi nkobe, kabiji nanchi pano obewa ukamwingijila nkambo yobe mooba obe onse.

<sup>48</sup> Kyaikala kya kumwenako kyalumbuluka kya Mamboawama a Yesu Kilishitu! Inge Kyasapwilwa, kimye kyaitabilwa, kabiji ne kimye kya Yubili; uji yense, nangwa wikaletu ng'anyi, wa mushobo ka ye ujimo, ng'anyi dinominesheni ye ujimo, wafika pepi kuya mu bubi, nangwa kika kyatama ne obewa; obewa wakonsha kukasuluka inge ntolopita ya Mamboawama yamvuma. Obewa wakasuluka!

<sup>49</sup> Pakuuba inge wavundamina nyuma yobe ku Mbila ne kukana Kwiyumvwa, monai, obewa wasabiwa mu kutwi nkobe, na mungele. Akyo kyalumbulula, kwamba mba, obewa wakilang'anya pa mulaini wa lusa ne luzhachisho, kabiji kechi ukomvwapo Mamboawama jibiji ne. Obewa kechi ukayapo kulutwe ne. Obewa wafwainwa kwikala muzha kutanchikilo yo ujimo, moba obe onse, inge wakana kumvwa mwaka waitabilwa.

<sup>50</sup> Bino, lubaji lukwabo lwa kikye, byonka byo Najikwamba, kechi kyakebelwenga ku kumbulwa ne, mambo awe Mesiyasa ubena kwiya, pakino kimye, ipo Aye po akaleta luzhachisho.

<sup>51</sup> Pano, abo bantu bakakelwe byepi kumumona Aye wajinga Ng'anyi? Kibapichile byepi? Kyakonsha kwikala byepi, byo kyajingatu patoka kyayukanyikwa kabiji kyo bamwesha? Kibapichile byepi kwikimona? Kimye Aye...

<sup>52</sup> Kyambo Kyamusango ka! Kilangulukaitu, “Jino juba akye Kinembelo kyafikizhiwa ku meso enu anweba bonse.” Ing'anyi wikyambile? Lesa Aye mwine, Ye ulumbulula Kyambo Kyanji Ayemwine. “Jino juba akye Kinembelo kyafikizhiwa.” Aye Mesiyasa, Ayemwine, waimene ku meso a kipwilo kasa abena kutanga Kyambo mu Baibolo, kibena kutongola kwi Aye mwine, kabiji ne kwamba mba, “Jaleelo akye Kinembelo kyafikizhiwa,” bino nangwa byonkabyo bakakelwe kwi Kimona.

<sup>53</sup> Ng'anyi musango walukatazho lwafwainwa kwikala bibye, bino kyamweka. Kyamweka bimye byavula. Kyakonsha kumweka byepi? Nangwa byonkabyo, byonka byo kyaubiwe mu bimye bikwabo, kupichila mu luketekelo lwa muntu byo akonsha kulumbulula Kyambo. Akyo kyo kyalengejile. Aba baitabila mu

oa mooba, batelelwe-mba baitabila, batolelenga byalumbulula pulisiti amba byo kyaamba Kinembelo. Onkao mambo Yesu, byo abujile kulamata mukachi kabo nangwa mu bipamo byapo ne, Bamufungileko kufuma mukachi kabo.

<sup>54</sup> Kabiji, onkao mambo, Aye kechi wayukanyikilwe kwi abo ne, mambo Aye wajinga wapusanako ne abo. Awa Muntu wabu Yesu Kilishitu wajinga wapusanako bingi kyakuuba mba kafwako nangwa umo wakonsha kubula kumumona amba ye Mwaana wa Lesa ne, mambo Aye wajinga kiyukilo kyalumbuluka kya Kinembelo akyo Kyamunembejilwe.

<sup>55</sup> Ajo jo jishinda Mwinakilishitu uji yense jo ayukanyikilwamo, umvwe bumi bwanji bwamwesha byonka bintu Mwinakilishitu byo afwainwa kuuba.

<sup>56</sup> Wakonsha kwimana byepi ne kwamba mba, “Jino juba akye Kinembelo kyafikizhiwa kumeso enu!” Byo kyajinga kyakilamo, byo kyajinga patokatu, nangwa byonkabyo aba bantu bakakelwe kumumvwa. Kika? Ke mambo akuuba mba batolele kulumbulula kwa mapulisiti bo batelekelengako.

<sup>57</sup> Kabiji bintu byapita kimye kyonse bibwezhapo abyo bine. Kabiji Kinembelo kiji nandumbulwilo Yakyo yavula, kabiji ne lumwekesho lwavula.

<sup>58</sup> Nobe kyakumwenako, kyaamba mu Baibolo, amba, “Kufuma mu Ijipita Amiwa mo naichila mwaana Wami,” kutazha kwi Yesu. Londaizhai kyokyo, kabiji musakutana mba, ne akyo kyatongola Yakoba, Kinembelo kimotu. Yesu wajinga Mwaana Wanji mukatampe. Yakoba wajinga mwana Wanji Ye aichile kufuma mu Ijipita, akyo Scofield kyo atongola kabiji ne bikwabotu nabyo byatongola ku kikye, mambo akyo kyo Kinembelo ko kyatongwelenga. Nanchi kyajinga na—na mikumbu ibiji; kyajinga na mukumbo kwi Yakoba waichilwe kulupuka, kabiji ne kwi Yesu waichilwe kulupuka.

<sup>59</sup> Kabiji abyo byokiji buleelo! Ke mambo akuuba mba tuji mulukatazho lwa byobyo, kabiji bantu bakakalwa kumona Bukine bwa kwa Lesa, ke mambo akuuba mba kuji byavula byalumbululwa byalengwa-na muntu bya Kyambo kya Lesa. Lesa kechi ukeba muntu kulumbulula Kyambo Kyanji ne. Aye ye Iye Mwine wilumbulula.

<sup>60</sup> Lesa waambile, mu ntendekelo mba, “Kwikale kyeya,” kabiji kyeya kyajinga konka. Akyo kechi kikebewa ne kulumbulula ne.

<sup>61</sup> Aye waambile mba, “Kisungu ukemita,” kabiji kya mubijilwe. Akyo kechi kikebewa ne kulumbulula kuji konse ne.

<sup>62</sup> Kimye...Lesa kulumbulula kwa Kyambo Kyanji kubiwa inge Aye wikimwesha ne Kwikishinikisha amba byokiji. Ako kokulumbulula Kwanji, ke Kwikilengela kyafikizhiwa. Apo po paji kulumbulula kwa Lesa, ke kuuba mba Aye walengela Kyambo Kyanji kyafikizhiwa. Aye Wikilumbulula kwi obewa.

<sup>63</sup> Nobe inge kechi kwajingapo kyeaya ne, kabiji Aye waamba mba, “Kwikale kyeaya,” kabiji kyaikala konka, akyo kechi kikebewa muntu uji yense kulumbulula ne.

<sup>64</sup> Pakuuba tuji na mitanchi yalengwa-na muntu yamvwangakana Nakyo, kabiji, inge kyaubibi, obewa—obewa Wikitambula kasa kyafuma mundonda. Kimye kyonse kikala byonkabyo.

<sup>65</sup> Bino Amiwa nkikilanguluka byo kyafwaijilwe kwikala. Langulukai pa kikye, aye Mesiyasa! Kika kyo bakakejilwe kumumona Aye? Mambo, bonka batangi bafwaijilwe kumuyuka Aye, abo bafwaijilwe kuyuka bulongo Kinembelo, abo bwafwaijilwe kumvwisha Binembelo, abo awe Muntu bamulengulwile ne kwamba mba, “Aye ke mwaana wa mubukende, kya—kyakutatwilapoti. Atweba kechi twakonsha kwitabila Kyokyo ne.”

<sup>66</sup> Myaka ya kulutwe, atweba kechi twaketekela kyokyo ne. Atweba tukafwila nakwamba mba Aye wajinga Mwaana wasemwa-mukisungu.

<sup>67</sup> Kabiji kikeya kufikizhiwa juba jimo amba, byonka bintu byo tubena kumona Yehoba kasa oba leelo, bantu mu mankuulo akeya, inge ko aji, bakafwilapo pa bintu byo tubena kwambapo leelo. Anweba mukekyuba inge kiyukilo kya lukinyama kyafika, kabiji kechi mukaswishiwa kusapwila Mamboawama muyuwe musango ne. Kimye kukwatakana kwa bipwilo byo kukobiwa, akyo kiji mundonda pa kyonka kino kimye ku kipwilo kya ntanda yonse, obewa ukabika katetesho ku lushimuno lwa bumi bobo, na mambo a Kikye.

<sup>68</sup> Obewa wafwainwa Kwikiketekela ponkapano. Inge booba ba mapulisiti bakonsha kusanguka, aba bamuzhachishe Aye, kechi bakonsha kumuzhashisha Aye ne. “Bino,” mwaamba mba, “inge Amiwa najingako, inge Naubile *kikananga-ne-kikananga*.” Kyawama, aya kechi yajinga nkulo yobe ne. Bino, ino yo nkulo yobe, akino kyo kimye.

Mwaamba mba, “Kyawama, inge Aye wajinga kuno!”

<sup>69</sup> Aye Baibolo waamba mba, “Aye ujitu pamo keesha, leelo, ne myaka yonse,” pamotu, nachi Aye uji pano. Bino, Aye uji pano. Monka mo yakomenako ntanda, yabailako, kabiji ne kufunda kwabaya, Aye uji muno mu musango wa Mupashi, ao ye bakonsha kubula kwipaya nangwa kufwa ne. Aye wafwiletu jimo; Aye kechi wakonsha kufwa ne jikwabo ne. Walengelwe mu bumuntu pakuuba mba Lesa afwe mu mubiji, na mambo a bubi. Bino pa kino kimye Aye kechi wakonsha kufwa ne; Ke Mupashi Wazhila.

<sup>70</sup> Pano, byo mwakonsha kulanguluka mba bamushikilwe Aye na mambo abibye bintu! Kintu kikwabo, kyakuuba mba Aye kechi wilamikile kulubaji lwabo ne. Nanchi, mwamona, akya kya mulengejile Aye kwikala muntu watama. Aye kechi

watwelele mu—mu bipamo byabo ne, kechi wanungakene na bung'anga bwabo ne, kabiji Aye kechi wanjipo na kintu kyakuba nakyo ne. Kabiji pano, pa byonse bye, Aye waesekelle konauna byonse byo banshimikile.

<sup>71</sup> Aye watwelele mu tepo. Atweba Aye tumutela mba Muntu kimote; Aye wajinga, pakuuuba bimye byavula tukakalwa kumvwa bukimote byo bwalumbulula.

<sup>72</sup> Aye wajinga Muntu wa lusa, bino nangwa byonkabyo tukakalwa kumvwisha lusa byo kyalumbulula bimye bimo. Kechi lusa lwa bumuntu ne, alwa kechi lo lusa ne. Pakuuba, *lusa* ke “kuuba kyaswa muchima wakwa Lesa.”

<sup>73</sup> Aye wapichile ku kizhiba kya—kya Betesenda, pa kibelo kyasakwa. Akwa kwalajile bantu, bavula bingi. Bavula bakukakalwa kubala. bino akwa kwajinga mabumba: bilema, bampofu, maulu alemana, banyana. Kabiji Aye wibomvwijile lusa bantu, kimye kyonse. Kabiji Aye waile ku muntu umo wabujile kulemana, mpofu, walemana maulu, nangwa wanyana; kape wajinga na lukatazho lwa bwanabulume, kape wajinga walemana wabula bulume. Wajinga nakyo pa myaka sate-eiti. Kechi kyajinga kya kumukatazha ne, kechi kyajinga kya kumwipaya ne. Aye walajile pa kilalo. Kabiji Aye waambile mba, “Wakonsha kwikala na butuntulu nyi?”

<sup>74</sup> Kabiji mwanamulume waambile mba, “Amiwa kechi njipo na muntu umo wakonsha kumbika mu meema ne, bino kimye kyo Mbena kwiya, kyawama, muntu umo watangilapo kulutwe yami.” Monai, aye wakonsheshe kwenda, aye wakonsheshe kumona, wakonsha ne kwenda, bino wajingatu wabula bulume.

<sup>75</sup> Kabiji Yesu wamwambijile mba, “Imana. Tola mwanya obe uyenga ku nzubo yobe.” Kabiji Yesu bamwipwizhe pa kyokyo, mambo vulukai Kinembelo kyo kyaamba kikye.

<sup>76</sup> Kechi kyakukumya ne! Inge Aye wakonsha kwiya ku Jeffersonville bufuku buno kabiji wauba kyubilo kya musango yewa, bakonsha kwamba pe Aye.

<sup>77</sup> Bino, vulukai, Aye wayishile na kuuba kintu kimo, kyajinga kyaswa muchima wakwa Lesa. Pano, akyo kitanwa mu Yoano Wazhila 5:19, mwakonsha kumona mukumbu. Aye waambile mba, “Kine, kine, Nemwambila namba, Mwaana kechi wakonsha kuba kintu nangwa kimo mwi Ayemwine ne; kanatu Aye kyo amona Bashanji kasa boba, ne Mwaana kyo obapo.”

<sup>78</sup> Pano, abo bafwajilwe kuyuka mba akwa kwajinga kushinikisha kwa bungauzhi bwa kwa Mosesa, “Mambo Yehoba Lesa wenu ukemwimenya Ngauzhi uji pamo ne amiwa.”

<sup>79</sup> Bushe mwamona, Aye byo amumwene awa mwanamulume, Waambile mba . . . Yesu wayukile mba waikala tuyewa musango pa myaka yavula bingi. Monai, byo ajinga Ngauzhi, Aye wamwene yewa muntu tuyewa musango; kabiji wayile na

kupita—Wapichile mukachi ka booba bantu, na kusezhasezha mu jibumba, poso Aye byo ataine yewa muntu.

<sup>80</sup> Wapitaila walemana, kilema maulu, mpofu, kabiji ne wanyana, nangwa byonkabyo wajinga Muntu uji na lusa. Bino, lusa ke “kuuba kyaswa muchima wakwa Lesa.”

<sup>81</sup> Pano, Aye twamutana, Aye byo abujile kukwatakana nabo pamo, Aye kechi wajinga na kyakuuba mukachi kabo ne, nanchi Aye watelelwé mba wabula kuyukanyikwa mu bantu. Aye kechi wajingapo na kimo . . .

<sup>82</sup> Kufumyako kyokyo, Aye waile mu topo juba jimo. Awa Muntu wayile momwa kabiji watana nzubo yakwa Lesa yayulwamo na biko byonka byokiji leelo. Abo bapoteshenga, ne kupotolola, ne kupipuzhanya kwa mali. Kabiji Aye wapinwine matebulu a mali; watolele mizhinge ne kwi ipikula, kabiji wibapumine bapipuzhanya mali mukachi ka topo. Kabiji wibatajile na bukaji, kabiji waambile mba, “Kyanembwa,” aleluya, “Mu nzubo ya Bataata yo nzubo ya milombelo; pakuuba anweba mwiyalula ke jiyyeng ja batupondo. Kabiji anweba, na bisho byenu, mwalengela mikambizho yakwa Lesa yaikala yabulamo bulume.”

<sup>83</sup> Oo, bushe jibumba jiji byobya jakonsha ku mwitabila Aye nyi? Ine, mwane. Abo bajinga bangulu-bekata mu machipa a tubungwe ne biko bya joja juba, poso basapwishi batwelelewá na mashika kyakuuba mba abo kechi bakonsha kumvwa kuzakama kwa Ngovu ya Lesa Wabulume bonse ne. Kechi kyakukumya ne awa mwanamukazhi mucheche wakonsheshe kukwata ku kya kumvwala Kyanji ne Kutambwilako lubuko; kabiji mushilikale wapendwa washipijile mu kilungi Kyanji kabiji kechi waumvwinepo bulume ne! Kiyilatu mu musango mo ubena Kwikikebelá. Kiyilatu mu kine kintu kyo ubena kukeba. Inge waya ku kipwilo, kiyilatu ku kyo ubena kukeba.

<sup>84</sup> Pano twamumona Aye kasa aimana byobya. Kechi kyakuzhinauka ne bantu bamujimwine, kujimuna . . . bang’anga bajimwine bantu, “Pano Aye ukeya kuno Sabando walondelapo, kabiji, inge Aye wikyuba, kechi mwakonsha ku muteleka Aye ne. Pano, obewa wakonsha kuyako waikala ne kwikala, bino kechi wakonsha kutako muchima ku byo Aamba ne, mambo Aye kechi uji ku jibumba jetu ne. Aye kechi waitabilwa ne. Aye kechi uji na kitupa kya lumvwang’ano lwa bupopweshi ne. Aye kechi Uji na kipepala kyakufuma ku kabungwe ne. Aye kechi ujipo na kintu kya musango yewo ne.”

“Ye ng’anyi Aye?”

<sup>85</sup> “Umo nsongwalume walubilamo wasemekelwe kukwe, kusemwa kwabula mushingi, kwa munzubo yakwa kapeta, awo bainanji Ye baimichile kasa bakyangye kusongolwa, kabiji babena kukeba kufayamina mu kyokya kintu kyabulesa.

<sup>86</sup> “Atweba twayuka mba, inge Mesiyasa waiya, Aye ukekila kufuma mu makonde a Mwiulu ne kuya ku ng’anga mukatampe ne kwamba mba, ‘Amiwa Bano, Kefasa.’” Bino twatana mba Aye kechi wikyubile tuyewa musango ne, mambo kechi kyanembelwe mu Kyambo mujoja jishinda ne. Kyajinga bisho byalengwa-na bantu kyalengejile mba baketekele kyokyo.

<sup>87</sup> Akya Kyambo kyaambile mba Aye ukeyatu monka mo Aishijile. Kabiji Aye waimene, na kutanga Kyambo, ne kwamba kwii abo mba, “Jino juba akye Kinembelo kyafikizhiwa ku meso enu.” Kabiji nangwa byonkabyo Aye bakakelwe kumumona nangwa Aye kechi bamuyukile ne, nobe byonka byo baubile mu mankulo akwabo.

<sup>88</sup> Nowa wafwajilwe kwamba kintu kimo, mu juba jo atwelele mu bwato kabiji ne kizhilo kyashikinkile. Mosesa wafwajilwe kusutula awa windo peulu ya bwato, watajile pangye ya kipwilo...Vulukai, Lesa washikile kizhilo. Kabiji aye wakonsheshe kwamba mba, “Jino juba akye Kinembelo kyafikizhiwa ku meso enu,” bino kimye kyajinga kyapwa pakyokya kimye. Aye wasapwijile myaka aduleendi na tweti, na kweseka kwibatwezha mu bobwa bwato bo ashimikile, ne kwibabuula mba Kinembelo kyaamba mba, “ABYO BYOBYAAMBA AYE NKAMBO, mvula ukankoma,” bino abo bapembelejile kimye kyabaya. Bino Nowa wafwajilwe kwambatu patoka mba, “Leelo, jino juba, Kinembelo kyafikizhiwa.”

<sup>89</sup> Mosesa, juba jimo Mumbulungwa wa Mujilo po aishile pa Mutumba wa Sinai na kupana bukamonyi ku lushimuno lwanji, Mosesa wafwajilwe kwamba mba, “Jino juba akye Kinembelo kyafikizhiwa.”

<sup>90</sup> Mosesa, mwayukatu, watelelwé mba muntu wakwa Lesa, ngauzhi. Kabiji kimye kyo bamwichilwenga, byo ajinga ngauzhi, aye wajinga na kyakupitamo kya bulesa. Pakuuba mba ekale ngauzhi, aye wamukumenye Lesa kilungi ne kilungi ne kwamba Nanji. Kabiji kintu kikwabo, kyo aambile kufikizhiwe, inge ne inge kafwako nangwa umo wa muketekejile ne.

<sup>91</sup> Nanchi kafwako muntu uji na nsambu ya kwitela aye mwine byobyo ne poso wisamba kilungi ne kilungi na Lesa, akwa kuusa ya kiselebwaa, ako nko akumenye Lesa, aye mwine. Kabiji bonse bantushi muntanda kechi bakonsheshe kulondolola kumufumyako aye ne; aye wajinga konka, aye wayukile mba kyamwekele. Mwinakilishitu yense wafwainwa kupita mu kyokyo kasa bakyangye kwamba kiji kyense amba Benakilishitu ne. Kyakupitamo kyobe obewa mwine!

<sup>92</sup> Amiwa nesambile na mwipwa wami, kimye kyapita kunyuma, nsongwalume mucheche wa ki Katolika, ao waambile mba, “Mwishes ba Bill, Amiwa naendauka kuku ne kuku, kuya konse konse, na kukebapo kintu kimo.” Bufuku pa bufuku, kuno

kupwila kasa kukyangye kutatula, aye wajjilengatu. Kabiji pa kimye kyapakachi ka bufuku, aye walotelenga biloto bya kwiya kwanji, kasa anyemena ku kitapisho, kobasapwijilenga, kabiji ne kwisolola amba uji mukilubo.

<sup>93</sup> Naambile mba, “Melvin, nangwatu uye kwepi, nangwa utwele mu bipwilo byavula, nangwa wambe, ba ‘Muji byepi Maliya,’ nangwa utambule mapesho avula bingi kufuma ku muntu, obewa wafwainwa kusemwa jibiji ku Mupashi wakwa Lesa. Kyo kyonka kintu kyakonsha kupwisha kilaka kya muchima wa muntu.”

<sup>94</sup> Kokuuba mba, Nayuka mba baji na kyakupingishamo, leelo, mu kya kusemwa jibiji, kwi imunatu maboko na musapwishi ne kubika jizhina jobe mu buuku. Bino, balunda, akyo ke kisho. Kechi Bukine bwa mu Baibolo ne. Inge byokiji, Byubilo bya Batumwa, mu kyapitala kyabu 2, kyafwainwa kutangwa bibye, “Kimye Juba ja Pentekositi byo jafikile, kafunga waishile na kwimuna maboko a bantu.”

<sup>95</sup> Bino waambile mba, “Kimye Juba ja Pentekositi byo jafikile,” patatwilo ya Kipwilo, “kwaishile kilulumo kufuma Mwiulu nobe kupupa kwa lubesha mukatampe, kabiji kyayuzhizhe nzubo yonse mo baikеле.” Abyo Mupashi Wazhila byo byoaishile kimye kitanshi. Abyo byo Kiya kimye kyonse kufumatu mu kyokya kimye. Aye ye Lesa, kabiji kechi upipula ne. Bino, Kitutwisha bantu.

Baamba mba, “Akya kyajinga kya mu juba jikwabo.”

<sup>96</sup> Kyawama, Aye ujitu pamo keesha, leelo, ne myaka yonse. Kimye kyonse Kipwilo po kyatambwile Mupashi Wazhila, kimye kyonse Kiiya nobe byo Aubile kimye kitanshi, mundondolwelo imotu, Byubilo 2:38; kechi kyapipulwapo ne, kechi kikapipulwa ne.

<sup>97</sup> Kijitu pamo nobe ndondolwelo yakwa dokotala na mambo akikola. Aye unemba ndondolwelo ya kyokya kikola, dokotala byo oba. Pano inge mwikitwala ku upana michi wabula kulumbuluka, kabiji aye ubikamo byavula bilengela kuweluka muchi, wikala wakooka bingi kyakuuba mba kechi upana bukwasho bwawama ne; inge aye wabikamo bulembe bwavula, byakonsha kukwipaya. Kyafwainwa kunembwa monka mwaambila dokotala.

<sup>98</sup> Kabiji ndondolwelo ya kwa dokotala pa mwakutambwila Mupashi Wazhila yapewa kwi atweba na Dokotala Shimona Petelo, pa Juba ja Pentekositi. “Amiwa nsakwimupa ndondolwelo. Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo, kabiji mu katambula wabupetu Mupashi Wazhila. Mambo ndondolwelo ke yaboba baji kwalepa, kabiji ne bonse mo bavujila Nkambo Lesa wetu boaketa.” Ayo ndondolwelo Yapeenape!

<sup>99</sup> Mosesa wajinga na kikye kyakupitamo. Aye waile mu kyokya kyaalo kabiji watatwile kubuula bantu, “Nakumenye Mumbulungwa wa Mujilo. Wajinga mukipupu kyatemenenga. Kabiji Aye wambujile mba ne mubuule, ‘AMIWA YAMI JIPO. Yanga konka; Nkekala nobe. Sendai mukombo mu kuboko kobe kabiji umukwate kufika ne ku Ijipita; kyonse kyo wakonsha kwipuzha, kikobiwa.”

Kyawama, kapepo pulisiti umo waambile mba, “Kechi muji maana ne!”

<sup>100</sup> Bino byo bamwene bine bishika bya kikye, watola, kyafikizhiwa, abo kechi bakonsheshe kukwachijila kimye kyabaya ne. Abo bayukile mba watumwa kwi Lesa.

<sup>101</sup> Pano, inge Mosesa waambile mba aye wikimwene kyokya, kabiji wikishimwine amba Bukine, nanchi Lesa wakonsha, inge akya kya Bukine, mu kumwesha ne kwikishinikisha kyambo kya yewa mutu, amba Bukine. Akyo kyakine.

<sup>102</sup> Inge Yesu Kilishitu waimene byobya ne kutanga watanga, aja juba, “Jino juba akye Kyambo kyafikizhiwa ku meso enu,” Lesa wafwainwa kulengela akya Kyambo kyafikizhiwa.

<sup>103</sup> Twimana pano bufuku buno ne kwaamba, mba, “Yesu Kilishitu ujitu pamo keesha, leelo, ne myaka yonse.” Lesa wakonsha kushinikisha kikye amba kikale byonkabyo, mambo Ke Kyambo Kyanji. Pano, kyubiwa byepi? Kisendatu Iwitabilo, pa Kwikitabila. Kisenda Iwitabilo, mu kuketekela Kyambo Kyanji, amba Kya Bukine.

<sup>104</sup> Monai byo kyaishile kufikizhiwa Mosesa byo alupwile baana, kabiji ne bonse ba mulondejilenga. Aba babujile kulondela baikeli mu Ijipita. Pakuuba aba balondejile Mosesa, byo bafumine mu Kalunga Kachila ne kufika mungyetu, Lesa waikijile pa Mutumba wa Sinai. Awa Mumbulungwa wa Mujilo waambwile mujilo pa mutumba yense, kabiji Jiwi jaambile kufuma momwa, kabiji Lesa wapaine aya mikambizho jikumi.

<sup>105</sup> Mosesa wafwaijilwe kuyako ku bantu, ne kwamba mba, “Jino juba Kinembelo kyo Nemubuujile, nobe ngauzhi Wanji, kyafikizhiwa mu jino juba. Amiwa ne mubuula mba Lesa wakumenye, kokwa ku kipupu kya mujilo, mu Mumbulungwa wa Mujilo, kabiji Aye waaambile kikye, ‘Amiwa nkoba... Akye kikekala ke kiyukilo. Obewa ukebaleta bantu pa kikye kifulo jibiji.’ Kabiji kuji Lesa, mu Mumbulungwa wa Mujilo umotu Ye nemubuujile mba Wajinga mukachi, kasa apepela peulu ya mutumba. Jino juba abwe bungauzhi bwafikizhiwa. Kuno Aye ubena kushinikisha amba bintu byo Naamba bo Bukine.”

<sup>106</sup> Lesa tupai banabalume bavula ba musango yewa, babula bujimbijimbi kabiji bakishika, bamba Byakine, kyakuuba mba Lesa Wabulume bonse wakonsha kushinikisha mba Kyambo Kyanji kikijitu kya Bukine! Aye ujitu pamo keesha, kabiji ne

myaka yonse. Kika Aye kyo akonsha kubula kwikyuba? Aye walaile kwikyuba.

<sup>107</sup> Yoshiwa wafwajilwe kwamba kintu kimo, juba jo abwelele ku Kadeshi-baleniya, amo mobaendele kyabaya mungyetu. Abo bazhinaukilenga ntanda mba kana yo ntanda Lesa yo aambile mba byo ikekala. Pakuuba Lesa wibambijile mba ntanda yawama, muji mukaka ne buki. Kabiji Yoshiwa ne Kaleba boboka babiji bekiketekejile, kufuma mu booba teni bashajilepo. Byo babwelele, bajinga na bukamonyi; bajinga na kizaza kya magelepu akyo banabalume babiji bakosa kyo bakonsha kusenda.

<sup>108</sup> Yoshiwa ne Kaleba baimene ponkapa ne kwaamba mba, “Jino juba akye Kinembelo kyafikizhiwa. Abwe bo bukamonyi bwa kuuba mba ntanda yawama.” Kine. Kika? “Abwa bo bukamonyi bwakwamba mba ke ntanda yawama. Kwepi ko mwakonsha kumona bintu biji nobe byobya, mu Ijipita? Kechi kwajingapo mampuzha abyobya ne. Pakuuba jino juba akye Kinembelo kyafikizhiwa.”

<sup>109</sup> Aye wafwajilwe kwamba, kintu kimo, byo a awile kabiji waambile mba sakwa ya Yeliko ikapona panyuma ya kuzhokoloka bimye sebeni, mooba sebeni, bimye sebeni pa juba. Kabiji byo bazhokolokele kimye kyapeleleko, sakwa yaponene. Yoshiwa wafwajilwe kwimana ne kwamba mba, “Jino juba, Kapitawa Mukatape wa mazhita a Nkambo wambujile milungu yapita amba kikamweka byonka bye, jino juba akye Kinembelo kyafikizhiwa.” Masakwa a kundukile, ajingatu pansi. “Iyai, twayai tukeyangate. Yakulubaji lwetu. Jino juba akye Kinembelo kyafikizhiwa.”

<sup>110</sup> Byo kyawama, banabalume ba kwa Lesa baimenako bintu byawama!

<sup>111</sup> Isalela, pa mukola, byo batambwile ntanda, baabukile. Pano bakekyuba byepi? Ke ng’ondo wa Mulombola. Muyulo ubena kwiya nkushi mambo sino ubena kusunguluka, kokwa ku Yudeya. Oo, kyamwekele nobe mukulumpo wabashilikale Lesa wajinga kamulanda, pakuleta bantu Banji kokwa, mu ng’ondo wa Mulombola, kimye Yondano po afikile peulu kukila byo ekala. Bimye bimo...

<sup>112</sup> Amiwa nakonsha kwimana ponkapano, inge Najinga na kimye, kya kwambapo ka kintu kacheche. Kimye kimo wakonsha kwikalala byobya na kaasa, nangwa wafwainwa kwikalala na kikola; obewa walanguluka mba, “Kika, ami, byonji Mwinakilishitu, nakonsha kwikalala muyuwe musango nyi? Kika kyo Nakonsha kwikela muyuwe musango, inge Amiwa ne Mwinakilishitu?” Kimye kimo Lesa uleka bintu byafika pa mfishi yabaya kyakuuba mba kechi wakonsha kumona ne, konse konse, nangwa kuji konse, kabiji pano Aye waiya na kulenga jishinda jenu jakupita, kyakuuba mba anweba mwakonsha

kwamba mba, "Jino juba akye Kinembelo kibena kufikizhiwa, akyo Aye kyo alaile kuuba."

<sup>113</sup> Aye wibalekele baana Bakihabelu baenda kuya mu kisha kya mujilo. Baambile mba, "Lesa Wetu wakonsha kwitupokolola kuyuwe mujilo wa mukisha kya mujilo. Bino, nangwa byonkabyo, kechi tukafukamina kipasha kyobe ne." Byo bafuminemo momwa, kunuka kwa kisha kyamujilo kwajinga pe abo...kafwako kunuka kwa kisha kyamujilo ne, nangwa byonkabyo, kwajinga pe abo ne; bafwaijilwe kwamba mba, "Jino juba akye Kinembelo kyafikizhiwa."

<sup>114</sup> Kimye Danyela po afumine mu jiyengo ja babokwe, aye wafwaijilwe kwamba kintu kimo.

<sup>115</sup> Yoano Mubatishi. Pakupitapo myaka foolo aduleendi ya kufunjisha basapwishi, kechi kyakukumya ne akya kipwilo kyajinga mulukatazho pa kyokya kimye! Byo amwekele mungyetu, mu Yondano, aye wafwaijilwe kwimana konkakwa kukitulu, byonka byo aubile, kabiji ne kwamba mba, "Jino juba akye Kinembelo, Isaya 40, wafikizhiwa."

<sup>116</sup> Byo Nakonsha kwimana ponkapano ne kwimubula byambujile pulisiti wakala! Waambile mba, "Mwaana, obewa kechi wapwisha yoya Mbila ne."

Naambile mba, "Zhindamaitu."

Aye waambile mba, "Mwatazha mu kuuba mba ba Pentekosito kechi bamona kikye ne?"

Naambile mba, "Ine."

<sup>117</sup> Aye waambile mba, "Amiwa ne kimona." Kabiji pulisiti wa ku Katolika, ne apo! Uu-uu. Aye waambile mba, "Kika kyo wakubujila kuya kulutwe?"

Naambile mba, "Zhindamaitu."

Aye waambile mba, "Lukumo lwikale kwi Lesa! Amiwa ne kimona."

<sup>118</sup> Kabiji pa kyokya kimye Mupashi Wazhila waponene pe nyenga yanji, waikele moka mu mpwijilo. Kabiji waimene, nakwamba mujimi ingi, kabiji wapaine kilumbululo pa kintu kyonka pulisiti ne Amiwa kyo twaambilengapo, pa pulatifomu. Kipwilo kyonse, mpuzha yonse, yatwelele mu kyongo. Kyatwajijiletu kufika ne kukupwila kwa mimba kwa kwa Oral Robert mulungu wapwa, nangwa mulungu wapwa kasa akyangye kufika ne, kabiji kyo kyajinga kyawkambapo pa kokwa kupwila kwa mimba. Kyakuuba mba awa pulisiti... Wasendelwe na Mupashi Wazhila, kyasolvwelwe ponkapa na yewa mwanamukazhi, nyenga yanji Naketekela mba byo kyajinga, pa byobya byaubilwenga pa pulatifomu, kabiji wasolwele akya kintu kyo twafilenga.

<sup>119</sup> Kimye kyo tubena kwikalamo, jino juba akye Kinembelo kyafikizhiwa. Jino juba Kyeya kya mabaanga abufuku kyaiya, kabiji tukakalwa Kwikimona. Monai.

<sup>120</sup> Yoano waambile mba, “Jino juba Amiwa ne ‘jiwi ja umo ubijika mungyetu,’ nobe byonka byaambile ngauzhi Isaya, ‘Nengezhezhai jimo jishinda ja Nkambo.’”

<sup>121</sup> Abo kechi be kikwatakenye ne. Amba, “Oo, obewa wi Yesu...obewa wi—yobe Kilishitu,” byokabyotu.

<sup>122</sup> Aye waambile mba, “Amiwa kechi ne Kilishitu ne.” Aye waambile mba, “Amiwa kechi nafikilamo kukasulula kwabilo Yanji ne. Bino,” waambile mba, “Aye waimana mukachi kenu, kuntu kumo,” mambo aye wajinga washininwa mba Ukekala konka. Aye ukekakalo mu juba janji, mambo Lesa wamubujile mba wafwainwa kumulumbulula Mesiyasa.

<sup>123</sup> Juba jimo Mwanamulume ukitwala waishile kwi aye, kabiji wamwene nobe Kyeya peulu Yanji, kiyukilo. Kabiji wabijikile, “Talai Mwanamukoko wa Lesa! Jino juba akye Kinembelo kyafikizhiwa pa meso enu.” Kine.

<sup>124</sup> Pa Juba ja Pentekositi, Petelo byo aimene na kwambula Kinembelo kyabo, kya Yowela 2:38. Kimye, bonse kyo basekelenga, aba bantu. Abo kechi baambilenga mu mulaka wabo ne. Baibilenga kikukuma kya kintu kingi. Aye Baibolo waamba mba, “Jimi ya mujilo.” Jimi ke “ya abenamo” jimi, kwakubula kwambapo kintu kimo ne, ke kikukumatu. Kunyema nyema nobe jibumba ja bantu bapendwa!

<sup>125</sup> Bonse baambileng mba, “Kyawama, abo bantu bapendwa. Bamonai, talai byo babena kumwesha, abo banabakazhi ne banabalume. Kechi baji na byubilo byawama ne,” byo byaambileng joja jibumba ja bapopweshi ba joja juba.

<sup>126</sup> Petelo waimene mukachi kabu, ne kwamba mba, “Balongo ne batemwe, anweba mwikal mu Yelusalema, kabiji ne anweba mwikal mu Yudeya, kiyukanyikwe kwi anweba mba abo kechi bapendwa ne, nobe byo mubena kulanguluka, mambo juba jikijitu lukeelo. Pakuuba kino kyo kyaambileng Yowela ngauzhi, ‘Kikeya kufikizhiwa mu moba akapelako mba, Nketulwila Mupashi Wami pa bantu bonse.’ Jino juba akye Kinembelo kyafikizhiwa.” Kyakine.

<sup>127</sup> Luther wajingatu pa kimye kyaitabilwa. Wesley wajinga pa kimye kyaitabilwa. Pentekositi wajinga pa kimye kyaitabilwa. Kafwako nangwa kimo kyabujile mundonda ne.

<sup>128</sup> Pano Mbena kwimwipuzha anweba mulangulukepo pa nkulo kabiji ne kimye kyo tubena kwikalamo, na Kyambo kyalailwa leelo. Inge kubwela mu mankulo akwabo, bantu bakonsha kwamba mba, “jino juba akye Kinembelo,” “jino juba akye Kinembelo,” pano ibyepi Kinembelo kya kino kimye? Ng’anyi kintu kyalailwa mu jino juba? Pepi potwaimana?

Ng'anyi kimye kyo tubena kwikalamo, inge koloko ibena kwenda, koloko ya kisayasi, kwashalatu mamineti asatu kufika pakachi kabufuku? Ntanda ibena kuzakama. Kipwilo kiji pa mwanya wa bubole. Kafwako nangwa umo wayuka po baimana ne. Ng'anyi kimye kya juba kino? Pano nga Kinembelo kya jino juba? Musango wa kipwilo, nangwa, byubilo bya kipwilo leelo!

<sup>129</sup> Mu ntanda, bumulwila ntanda, ndonda ya muntanda, yaikala yabola monka mo yafwainwa kwikela. Amiwa kechi ne mulwila ntanda ne. Amiwa ne Mwinakilishitu. Bino, Amiwa kechi jipo namwingilo wakwamba pa byabumulwila ntanda ne, bino Nasaka kwamba mba babola kumbaji yonse ibiji.

<sup>130</sup> Amiwa navotele jimo, ajo jajinga ja Kilishitu; Amiwa nafwainwa kuwina. Diabola kechi wavotejile ne, bino Kilishitu wavotejile; kyailatu mujishinda ka Amiwa jo navotejilemo. Amiwa nasekela Navotejile pe Aye; lekai ntanda yambe byonse byobakeba kwamba. Amiwa nakiketekelatu mba Aye ujitu pamo keesha, leelo, ne myaka yonse. Aye ukekishinikisha. Aye kine ukekyuba. Kyakine.

Kulenga mambo kubena kuyatu palutwe, byubilo byatama bya banyike!

<sup>131</sup> Talai pa kyaalo kyetu, kimye kimo kyajinga jiluba ja pantanda, kukasuluka kwetu kukatampe kwalengelwe kunyuma kokwa mu—mu...pa kimye kyakubijika kwa kutambula bwanabwabene, kabiji kubijika kwa bwanabwabene kwafwachikilwe, kabiji twajinga na kukasuluka, kabiji bashakulu bentu, kabiji ne bintu byo baubile, twajinga na kyaalo kikatampe.

<sup>132</sup> Pakuuba pano kibena kubola, kabiji ne kwabenamo, ne kusukena, kabiji ne kulekelelako. Kabiji ne kusokesha bantu, amba batambule mali akutuma kokwa, akupota bulunda na balwanyi baabo; babena kubwela na kwibitaya mu bilungi byetu. Nkondo itanshi ya ntanda yonse, nkondo ya bubiji ya ntanda yonse, kabiji babena kuya ku yabusatu. Kyakine. Bumulwila ntanda bwabola, bwasupwa, bwabola kufika ne pansi. Monka mwaambil Mateo 24 amba byo kikekala, "Kyaalo kikemena kyaalo kikwabo, bufumu bukemena bufumu bukwabo." Byonse bye bintu bikobiwa. Twayai tumone kikye. Kijitu bulongo.

<sup>133</sup> Monai kikwabo, kuya palutwe kwa kupesapesa kwa masayasi. Pano, kimye kimo, nobe...Bankambo babalume baile na kumona bankambo babakazhi, mu kikochikala. Pano ke ndeke, nangwa kuzhokoloka mulwelele, kuya mwiulu. Kintu kikatampe...Byepi, ng'anyi waambile bibye? Danyela 12:4, waamba mba, "Maana akayanga na kuvula mu moba akapelako." Twamona kimye kyo tubena kwikelamo. Pano monai awa—awa musango mwaikela ntanda, musango wa sayaasi.

<sup>134</sup> Kabiji monai ne jikwabo, leelo, mu ndonda ya bya kufunda kwetu. Pano kechi mweseke kukana kikye ne. Amiwa njina kipepala kyanyushi, babena kufunjisha bukende mu bipwi-... mu masukuulu etu, a bana basukuulu babena kuuba musango wa bulalelale na bakwabo, pakumona kana bakonsha kwikala na basambe pantanda. Ee, mwane.

<sup>135</sup> Pano ibyepi mu bung'anga bwetu? Bufuku buno Njina kibese kya nyushi. Akwa ku Los Angeles, California, ako jibumba ja basapwishi, ba Baptist ne ba Presbyterian, bamwingilo, baletetele jibumba ja bantu besamba na banabalume bakwabo kabiji bonka besamba na banabalume bakwabo, amba tubena kwibaleta kwi Lesa. Sakiji, ke jifingo ja uno awala, musango wa Sodoma! Kabiji mizhilo ibakasa ne kwibakasa.

<sup>136</sup> Pano kwepi nkotuji? Mitanchi yonse yo tuji nayo yabola. Amiwa namona kuvula kwa besamba na banabalume bakwabo mwaya kyaalo kya United States bavujilako tweti nangwa sate paseti kukila pa mwaka wapwa. Langulukai kyokyo, mwanamulume kwikala na mwanamulume mukwabo, nobe byonka byo baubile mu Sodoma.

<sup>137</sup> Kulenga mambo kwavujilako, byubilo byatama kufuma ku banyike! Ng'anyi awala ye tubena kwikalamo? Jino juba akye Kyambo kya bungauzhi kyafikizhiwa.

<sup>138</sup> Ntanda ya bupopweshi, ne kipwilo akyo kine, kipwilo, kipwilo-kyaitwa, akye kyotwita mba kipwilo-kyaitwa, nkulo ya kipwilo kyapelako, nkulo ya kipwilo kya Pentekosito, kwepi kokiji? Kiji mu Laodikeya, nobe byonka byaamba Kinembelo.

<sup>139</sup> Leelo banekenesha mizhilo. Banabakazhi baabo bamvwala kichika. Banabalume baabo baji... Ke kintu kyatama bingi. Bamo mwiabo basongolwa bimye bisatu nangwa foolo, kasa baji mu kije kya badikoni, kabiji ne bintu byonse. Bakokesha mizhilo, kabiji baletamo mazhikakanwa, mambo babikamo mankaso ne kutola lubaji pamo na ntanda.

<sup>140</sup> Kabiji, leelo, baji na bishimikwa byawama, byo bakyangye kwikalapo nabyo. Mampuzha amo, bamo babena kushimika bishimikwa bya madola-fifite-milyoni, fifite milyoni dola. Bapentekosito! Kyaikalanga kuuba mba ujitu mu koona, myaka tweti-faivi yapitapo, na kwimba kisekeseka. Baamba mba, "Atweba..."

<sup>141</sup> Mambo, Kinembelo kyaamba, mu Lumwekesho 3, amba obewa wi "Munoshi," amba, 'Amiwa nanooka. Naikala nobe mfumu wa mukazhi. Amiwa kechi nakajilwa kintu nangwa kimo ne.' Kabiji ne kwikiyukatu ne amba ne wamalwa, ne ulenga lusa, muyaji, uji bwamba, mpofu, kabiji ne kwikiyukatu ne!"

<sup>142</sup> Jino juba akye Kinembelo kyafikizhiwa ku meso enu. Amena! Amena kyalumbulula mba "kikale byonkabyo." Amiwa kechi mbena kwiyitabizha amiwa mwine ne, bino Nalumbulula

mba Amiwa Nekiketekela mba Kyabukine. Jino juba akye Kinembelo kyafikizhiwa.

<sup>143</sup> Kipwilo kya Pentekosito kiji mu musango wa Laodikeya. Oo, abo bakitoloka ne kubijika, kabiji ne kutwajijila inge nyimbo ibena kwimbiwa. Inge nyimbo yaleka kwimba, nangwa nyimbo ya babbitiniki ibena kwimba abo ke beitele mba ya Bwinakilishitu, kabiji umvwe akya kyaleka, lukumo lonse lwafumapo. Ee.

<sup>144</sup> Inge kutumbijika Lesa kwa kine, kechi kujipo mawiso avula kabiji ne bwavula—bwavula bulume mu ntanda bwakonsha kwi kulekesha ne. Inge kine kwafuma kwi Lesa, kechi kisenda nyimbilo ya byombesha ne. Kisendatu Mupashi wa Lesa kwiya pe akyo. Akyo kyo kikyuba.

<sup>145</sup> Kabiji abo be Kilubilemo kala, mambo abo babika kyonse kyabupe kya Mupashi Wazhila, “kwikala ke kiyukilo kya kwamba mujimi.” Kabiji Amiwa naumvwapo badiabola ne balozhi kwamba mujimi.

<sup>146</sup> Aye Mupashi Wazhila ke Kyambo kya Lesa mwi obewa, awo wimwesha Ayemwine pa kwitaba kyokya Kyambo. Pangye yakyokya, kuuba kyaikala Mupashi Wazhila ne. Inge kyaamba mba ne Mupashi Wazhila, kabiji wakana Kyambo kimo kya mu Baibolo, kuuba kyaikala Mupashi Wazhila ne. Abo bobukanyi bwakuuba mba kana waitabila nangwa ine.

<sup>147</sup> Monai kiyukilo kikwabo kikatampe. Ba Yudeya baji muntanda yabo; kyaalo kyabo obe bene, baji na mali abo, bumembala bwa United Nations. Baji nazhita yabo. Abo baji na bintu byonse. Baji muntanda yabo; akyo, Yesu kyo aambil mba, “Fundai kishipi kya ku kichi kya mukuyu.” Abyo byo baji, babwela monka mu kyaalo kyabo. Jino juba akye Kinembelo kyafikizhiwa, ba Yudeya baji mu ntanda yabo.

<sup>148</sup> Jino juba akye Kinembelo kyafikizhiwa, Nkulo ya Kipwilo kya Laodikeya.

<sup>149</sup> Jino juba akye Kinembelo, Mateyo 24, kyafikizhiwa. Ntanda iji mu bubole, kyonsetu; byaalo na byaalo kwiimena, bitentashi mu mampuzha apusanapusana, tuzhimbiji tukatampe kwikila pansi, na kusukensa byaalo, kabiji ne bikwabotu, byamalwa bikatampe konse konse. Jino juba akye Kinembelo kyafikizhiwa.

<sup>150</sup> Pano twatana musango wa ntanda. Twamona kipwilo po kyaikalatu kituntulu—kituntulu, bu kabungwe, dinominesheni, twamona po byafika. Twamona byaalo po byafika. Kabiji twamona mba jino juba aye milaye yafikizhiwa.

<sup>151</sup> Pano, bino mu jino juba kuveya wakilapo, Lukunwa Wabufumu wakwa Abulahama. Abyo kine byo Kikekala, ukekala Musongwa Wabufumu ku Bufumu, Mwaana walailwe. Nobe byonka byo Najikwamba bufuku bwapita, kechi ukekala

lukunwa wa ku mubiji ne, ukekala Lukunwa wa bumupashi. Kukekala Musongwa wa bumupashi ukeya, ao ukekala Lukunwa Wabufumu wa Lwitabilo lwa bufumu bwa Mwaana Wabufumu wa kwa Abulahama. Mukazhi ukeya kutanwako mu mooba akapelako, kabiji kimye ne mpuzha ke mulaye wapewa ku Mukazhi.

<sup>152</sup> Monka mwaila Malakai 4, Kinembelo, kukekala Mbila ayo ikasukenya michima ya bantu kubwela ku bashakulu batumwa jibiji. Kukekalapo umo pakyokya kimye, mu bulume bwakwa Elaija, ao ukeya pa kyokya kimye; muntu wamungye ao ukeya, kabiji ukekala na Mbila ayo ikabwezha jibiji ku Kyambo. Akyo kyo kimye kyo tubena kwikalamo.

<sup>153</sup> Nanchi, pano langulukai, Ne mwipuzha pa kino kimye, anweba bantu muno mu Jeffersonville. Mu 1933, akyo Kyeya kyabulesa kyaikijile kokwa ku mukola, aja juba Nabatizhilenga faivi aduleendi mu Jizhina ja Yesu Kilishitu, nobe nsongwalume wa-myaka-tweti. Kyaambile Mbaka, Jeffersonville? Kyajinga Kika kya kokwa kutatwilo ya Mukwakwa wa Spring, kimye *Pepala Wabyambo*, Naketekela kyajinga mu *Sawakya wa Louisville*, mo mwajinga Yuwe sawakya? Kyaile kufika ne mu kabungwe ka Basasanya Byambo, kufikatu ne mu Canada. Dokotala Lee Vayle wikichibileko ku yewa pepala, kyafikile ne mu Canada, mu 1933.

<sup>154</sup> Byo Nabatizhilenga muntu wami wabu sebetiini, mushi ya yuwe Kamonyi; kabiji mwayuka jishimikila jonse. Kabiji byo Naimene popa, nabatizhilenga muntu wabu sebetiini, Kyeya kyaishile kufuma Mwiulu, kyasaminenga peulu, nobe Kabaangabanga kabena kupona kufuma Mwiulu. Aja Jiwi jaambile mba, “Byonka Yoano Mubatishi byo atuminwe na kutambulwila kwiya kutansi kwa Kilishitu, Mbila yobe ikatambulwila Kwiya Kwanji kwa bubiji, muntanda yonse.” Jino juba akye Kinembelo kyafikizhiwa.

<sup>155</sup> Jino juba! Lesa wijilaile. Kika kyamwekele? Jino juba Kyaya kuzhokoloka ntanda yonse.

<sup>156</sup> Kabiji kimye Lesa kyo aishile popa ne kwaamba mba, byo Najinga nsongwalume mucheche, mukipupu kyatemenenga, nangwa kipupu kokwa, kyajinga na mujilo wa Mumbulungwa Wamujilo, akwa ku mpuzha ya kwa Wathen ku Utica Pike; nasendelenga meema kokwa, kufuma ku kipaka kuya kobatekela lutuku, anweba mwayuka bukine bwa kikye. Aye waambile mba, “Kechi ukapepe ne, nangwa kutoma ne, nangwatu kuzhilulula mubiji obe ne, mambo kuji mwingilo obe wakwingila byo ukakoma.” Amiwa nashimuna kyokyo amba Bukine, namba Amiwa ne Kimwene. Kabiji Lesa, nobe byonka byo Aubile ne Mosesa, waambile ku kipwilo, ne kwamba mba, “Abwe ke Bukine.”

Jino juba akye Kinembelo kyafikizhiwa mukachi ketu.

<sup>157</sup> Monai byo Aambile pa kuyuka mipashi, kabiji ne byo kyafwainwa kwikala; kufuma pa kubikapo maboko, ke kuya ku kuyuka byafyamika bya mu muchima. Jino juba akye Kinembelo kyafikizhiwa ku meso etu.

<sup>158</sup> Aye milaye yalailwe, monai, yonse ye milaye yashinikishiwa kabiji ne kufikizhiwa kupichila mu Lesa wa mulaye. Talai, kyakobekewa mu Washington, DC, bufuku buno, kipikichala kya Malaika wa Nkambo!

<sup>159</sup> Nobe George J. Lacy, tangi wa kipamo kya FBI kifwachika minwe ne bipepala bya masawakya bya kafulumende wa United States, Kyapeselwe kufuma ku Houston, Texas, ne kwamba mba, “Akye kyo kyonka Kintu kyabulesa kyakikopewapo kala muntanda yonse.” Aye wafwaijilwe kuyuka; aye ye sendwe wakila mu ntnada yonse, pa kikye.

<sup>160</sup> Monai, Kyakobama kokwa, kya Bukine, Mumbulungwa wa Mujilo umo yeka watangijile Isalela amwa monka mungyetu. Ubena kutangijila leelo, Mbila ya musangotu umo, ya kuuba mba, “Fumaimo mu Ijipita!” . . . . . Jino juba akye Kinembelo kyafikizhiwa. Anweba mwayuka Mbila Aye yo aambilé.

<sup>161</sup> Monai pa kimwesho kya ku Tucson, myaka isatu yapita, kimye kyo naimene popa mu mukwakwa. Kimye, myaka faivi akya kasa kikyangye kubiwa ne, Aye waambile mba, “Juba muzhi po bakapopa pompo kulutwe ya ngeti, ukalulukile kuya ku Musela.” Balongo bami ba ku tabbanako kuno, bayuka kyokyo bulo- . . . akya—akya kimye. Abyo ibyo.

<sup>162</sup> Kabiji aja juba Mr. Goynes ne bakwabo bajinga kokwa, kabiji bapopele lupompo pansi, Naambile ku mukazhi amba, “Pajipo kintu kimo pa kikye.”

Aye waambile mba, “Kyo kika?”

Kabiji Naile na kutala mu buuku wami wa mucheche. Abyo byokyajinga.

<sup>163</sup> Kabiji alwa lukeelo lwalondejilepo, pa teni koloko, naikele momwa, mu lumu wami, pepi nobe teni koloko, Malaika wa Nkambo waishile. Aye waambile mba, “Yanga ku Tucson. Obewa ukekala ku buyekemusela wa Tucson, kabiji kuveya ba Malaika sebeni mu jibumba abo bakasukenya ntanda akwa ko ukekala.” Kabiji waambile mba, “Kikakubuulwa konkakwa.”

<sup>164</sup> Baanga bavuluka kyokyo, kuno, kasa kikyangye kumweka? [Kipwilo kyaamba mba, “Amena.”—Waku.] Muji banabalume baikala muno mukishimikwa bufuku buno, baimene ponkapa po kyamwekejile.

<sup>165</sup> Kabiji waambile mba, “Atwa Tutetesho Tutanu na tubiji twa byafyamika byakama bya Baibolo yense bikashikulwa, kabiji ne kufikizha Lumwekesho 10, amba mu Mbila ya kwa Malaika wa butanu na bubiji abyebintu byafwainwa kufikizhiwa.” Jino

juba akye Kinembelo kyafikizhiwa ku meso etu. Jino juba akye Kinembelo kyafikizhiwa.

<sup>166</sup> Mwaka wapwa, kasa twaimana pa mpuzha imo, Mr. Wood kuno ne Amiwa, twakajilenga peulu ya katumbatumba, nobe nakujila, mambo bakazhi banji bakolelwe, aye Mupashi Wazhila waambile mba, “Tola jibwe jalala popa. Jintaye mu lubesha. Inge jabwela pansi, wambe mba, ‘ABYO BYOBYAAMBA AYE NKAMBO, kukekala luzhachisho lukafikila panopantanda.’ Mbuulai mba usakumona kuboko kwa Lesa, mu maawala acheche a kulondelapo.”

<sup>167</sup> Amiwa nabujile Mr. Wood; po aji bufuku buno. Kabiji, Nalanguluka mba, eiti nangwa teni banabalume, nangwa fifitiini, abo bajingako pa kyokya kimye byo kyaubiwe; lukeelo lwalondejilepo, apo Nkambo po aishile mu kazhimbiyi ne kutabula mutumba kwituzhokoloka, kabiji kyachiba bichi peulu yabyo, ne kuvuma jisatu, kabiji waamba mba, “Luzhachisho lwatala kulubaji lwa Kitulu kya Kumuzhika.”

<sup>168</sup> Mooba abiji panyuma yakyokya, Alaska wakebele kwibila mushi ya ntanda. Kabiji kufuma ponkapa, peulu-ne-pansi ya Kitulu, luuya lwa luzhachisho lwa Lesa lwaimena katajilo ka bumupashi. Kuji kipembe kya kyela kyakapotwe, kuji kipembe kya lusununu, kabiji kuji kipembe kya bubi.

<sup>169</sup> Lupipu lwabwikalo bwa bantu bwaendela pamo na juba; ne Mamboawama nao pamotu. Byafuma ku musela ne kuya ku muzhika, nobe byonka biya juba. Kabiji pano Luji ku Kitulu kya Kumuzhika. Kechi lwakonsha kuya kulutwe ne; inge Lwaya kulutwe, Lukabwela jibiji ku musela.

<sup>170</sup> Aye ngauzhi waambile mba, “Kukekala juba ajo jikabula kutelwa mba bufuku nangwa mba mute ne,” juba jashinshipela, mvula wavula ne kafwa, byafikilamo kuyukatu kutwela mu kipwilo nangwa kubika jizhina jobe mu buuku. “Pakuuba kukekala Kyeya mukimye kya mabaanga abufuku.” Jino juba akye Kinembelo kyafikizhiwa.

<sup>171</sup> Jimo—jimo j-u-b-a jisamina ku musela jo j-u-b-a jimo jizhikila kumuzhika. Kabiji M-w-a-a-n-a umo wakwa Lesa awa waishile kumusela kabiji ne kwishinikisha Ayemwine nobe Lesa wamwekanyika mu mubiji, ye umo M-w-a-a-n-a wa Lesa uji kulubaji lwa muzhika kuno, ao ubena kwimwesha Ayemwine mukachi ka kipwilo bufuku buno, ye umotu keesha, leelo, ne myaka yonse. Akya Kyeya kya mabaanga abufuku kya Mwaanaa kyaiya. Jino juba akye Kinembelo kyafikizhiwa ku meso etu.

<sup>172</sup> Kwepi nkotuji mu ino nkulo ya kwa Abulahama? Kwepi nkotuji mu kino kimye kikatampe kyo twaimanamo, kimye kikatampe kyo tubena kwikalamo? Bimwesho byonse byafikizhiwa.

<sup>173</sup> Pano ibyepi kimye mulunda netu wamwingilo wa mucheche kuno, kipwilo kyo twingila nakyo, Junior Jackson, wayishile

kasa abena kunyema lubilo bufuku bumo, amiwa najinga koka, waambile mba, "Amiwa najinga na—na kiloto, Mulongo Branham, akyo kibena kukatazha. Namwene balongo bonse bampwila pa katumba." Kabiji waambile mba, "Pokapa pa katumba, obewa witufunjishenga bisopelo byanembelwe, kyamwekele nobe, bisopelo bimo pa kyokya kimye byanembelwe mu jibwe. Kimye kyo wapwishishe byoba, byonse byapwile, obewa witubujile, amba, 'Iyai pepi,' kabiji atweba bonse twapwijile pamo."

<sup>174</sup> Waambile mba, "Obewa wafumine kuntu kumo kabiji, kyamwekele nobe, wajinga na mungwala kabiji wapumine peulu ya pilamenda yaicheche ne kushikuka ya shikuka. Kabiji, byo kyaubiwe," waambile mba, "jibwe jitoka jo babula kunembapo. Kabiji witubujile mba 'tutale mu kikye.'" Kabiji anweba bonse... "Atweba bonse twatatwile kumonapo." Waambile mba, "Naalwile mutwe wami, kabiji Nakumwene kasa uya ku muzhika, wailenga na ngovu, kuya kuzhikila juba." Baanga bekivuluka? [Kipwilo kyaamba mba, "Amena."—Waku.]

<sup>175</sup> Kabiji Naimene popa pa kimye kicheche poso Mupashi Wazhila byo ekisolwele. Naambile mba, "Aye Baibolo yense, wasololwa ku muntu, kupichila mu lubingisho, kutokeshiwa, lubatizhilo lwa Mupashi Wazhila, lubatizhilo mu Jizhina ja Yesu, ne byonse bye bintu, byasololwa; bino nangwa byonkabyo mujii byafyamika mukachi, mambo a kuuba mba Baibolo washikiwa na Tutetesho Tutanu na tubiji. Amiwa nafwainwa kuyako nakutana bibye."

<sup>176</sup> Alwa lukeelo Bamalaika sebeni byo baishile kabiji kyavumine pantanda, ne mabwe asamaukijile konse konse, Bamalaika sebeni baimene ponka kabiji baambile mba, "Bwela ku Jeffersonville, konka nkowafuma, mambo Tutetesho Tutanu na tubiji twa byafyamika bitanu na bibiji tukashikuka."

<sup>177</sup> Pano mpotuji, leelo, twakwatakanya *Lukunwa wa Muloolo*. Mu mobatuacheche, inge Lesa waswa, tukakwatakanya bukine bwa *Masongola Ne Kwikana*. Kabiji ne byonse bye bintu Lesa byo ashikula, Katetesho konse, byafyamika kufuma ku kintendekesho kya inontanda. Kabiji twaikala mulusekelo, Kyeenyi kya mapesho Anji! Akyo kine. Jino juba, akye Kinembelo!

<sup>178</sup> Awa magazini wa *Bumi* wasendele sawakya wakyo, "Kizhingu kya Kyeya kyaafyaamika kyaimana mwiulu ku Tucson ne ku Phoenix," mu musangotu umo monka mo Nemubuujile pepi nobe mwaka umo kasa kikyangye kubiwa, ne byo kikekala, kabiji nobe kinshilwa kya makonka asatu. Kipikichala kyakobama monkamwa mu kipwilo. Anweba mwajinga nayewa magazini uji nakyo. Byo byokyajinga, monka mokyaubijilwe. Baambile mba, "Kiji na tweti-sebeni mailoshi kuya peulu kabiji sate mailoshi mu mbavu." Abo kechi

bakwatakanya kufika ne leelo ne. Kyamwekele bukyafyamika kabiji kyazhimang’ene bukyafyamika.

<sup>179</sup> Mulongo Fred Sothmann, Mulongo Gene Norman ne Amiwa, twaimene popa, bisatu ke bukamonyi, nobe peulu ya mutumba: Petelo, Yakoba, ne Yoano, bapaine bukamonyi, baimene popa kabiji be kimwene byo kyamwekele, kabiji be kimwene kyaubiwa.

<sup>180</sup> Abyo byo Kiji, kyakobamine mwiulu; palepa, kechi mujipo luya lwatalala ne, kafwamo kime nangwa kintu kiji kyonse kyakulenga ka—kafwa ne. Pano aishile byepi momwa? Bajinga ba Malaika bakwa Lesa babwelelenga, panyuma ya Mbila yabo. Jino juba abwe bungauzhi bwafikizhiwa mukachi ketu. Jino juba akye Kinembelo kyafikizhiwa.

<sup>181</sup> Monai, Tutetesho Tutanu na tubiji twashikulwa. Kazhimbiji kaji ku Kitulu kya Kumuzhika. Pano, kechi kimupite kikye ne, nobe byo baubile kunyuma kokwa.

<sup>182</sup> Pano, milanguluko yetu, ibwele pepi ku juba jetu. Pano nga Kinembelo kyaambapo mbaka mu buleelo, kabiji ne pa kimye kyo tubena kwikalamo? Yesu ubena kwamba... Amiwa kechi nji na kimye kya kwibisenda byonse ne, bino Nasaka kutola kikye kasa tukyangye kushika.

<sup>183</sup> Yesu waambile mba, mu Luka Wazhila kyapitala kyabu 17, veeleshi wabu 30. Yesu Kilishitu, Kyambo Aye mwine! Bushe mwaketeckela kyokyo nyi? Yesu Kilishitu, Kyambo Ayemwine, waalukile ke muntu, waambile ne kwamba Kyambo byokikekala mu kimye kya kumpelo, kiyukilo kikekala kika kyampelo ya inontanda. Aye wibambijile mba kyaalo kikemena kyaalo kikwabo, bino Aye waambile mba, “Byonka byo kyajinga mu moba a Sodoma, nanchi byobyo kikekala mukimye kya kusololwa Mwaana muntu.”

<sup>184</sup> Pano, kimye Yesu kyo aishile panopantanda, Aye waishile mu majizhina a Bwaana asatu: Mwaana muntu, ao ye ngauzhi; Mwaana wakwa Lesa; kabiji Mwaana Davida.

<sup>185</sup> Bino, Aye waikele panopantanda. Aye kechi waambilepo mba Ne Mwaana wakwa Lesa ne. Aye waambile mba, “Amiwa ne Mwaana muntu.” Yehoba Ayemwine watelele Ezikyo ne bangauzhi amba, “Mwaana muntu.” Mambo, Aye wayishile na kufikizha Kinembelo nobe ngauzhi. Mosesa waambile mba, “Aye Yehoba Lesa wenu ukemwimenya Ngauzhi uji pamo ne amiwa.” Ao oene mambo Aye kyo abujiile kwikala Mwaana wakwa Lesa kokwa, mambo Aye wajinga Mwaana muntu. Aye... “Akya Kyambo kyayishile ku bangauzhi.” Kabiji Aye wajinga Kyambo mu Kuyula konse. Mwaana muntu, ye—ye ngauzhi mukatampe... Kechi ye ngauzhi mukatampe ne, kana Lesa-Ngauzhi, “Kuyula konse kwa Bulesa mu mubiji kwajinga mwi Aye.” Onkao mambo, Aye wajinga Mwaana muntu.

<sup>186</sup> Pano, pa myaka biumbi bibiji, Aye wayukanyikwa kwi atweba mba Mwaana wa Lesa, Mupashi.

<sup>187</sup> Kabiji mu Myaka kiumbi kimo, Aye ukekala Mwaana wakwa Davida, pa Jitanda. Atweba bonse twayuka kyokyo, twaketekela Binembelo.

<sup>188</sup> Bino, Yesu waambile mba, konka kumpelo ya ino nkulo ya kipwilo yo twaikalamo, amba “Aye Mwaana muntu ukemweesha jibiji mu musango umotu byonka byo kyajinga, byonka byo kyajinga mu Sodoma.”

<sup>189</sup> Tajishai musango, mwaila jishimikila, mo ekipanyijile Aye. Aye waambile mba, “Byonka byo kyajinga mu mooba,” patanshitu, “akwa Nowa, byo bajilenga, ne kutoma, kwisongola, ne kwipana mu masongola.” Pano Aye waletete, kyalondejilepo, ne kyapelako, ku Mwaana muntu, ku Sodoma. Mambo, akwa Aye waingijilenga na ba Yudeya; apo, ku Sodoma, Aye ubena kwingila na ba Ngetila. Akwa, Aye wibonawine na muyulo wa meema, mu luzhachisho; kuno, ku ba Ngetila, Aye wibasokele bonse mu juba ja Sodoma. Abyo ibyo. Aya ntanda ya ba Ngetila yasokelwe kokwa, “kabiji byo byokikekala kimye Mwaana muntu ukasololwa.” Kechi ke meema ne, pakuuba kikekala ke mujilo pa kikye kimye. Yesu watangile kufuma monka mumo motutanga mu Ntendekelo 23, Aye byo atangile pa Sodoma.

<sup>190</sup> Pano, atweba twaitaba byubilo byo aambapo, pa byubilo bya ntanda ya Sodoma, Benasodoma, byubilo bya Sodoma. Atweba, bonse, tusa kwamba mba “amena” pa kyokyo. Twaketekela kyokyo. Kijitu bulongo.

<sup>191</sup> Kabiji byubilo bya bumupashi wa Laodikeya, kipwilo kya ku mubiji, twaamba mba “amena” ku kyokyo, kabiji twaswa biyukilo byabo. Twayuka mba kiyukilo kyonse kiji koka. Kipwilo kiji mu Laodikeya. Twayuka kyokyo.

<sup>192</sup> Twayuka mba ntanda iji mu musango wa Sodoma. Abyo ibyo nyi? Atweba bonse tusakuswa kyokyo.

<sup>193</sup> Bino nga kiyukilo kyakwa Abulahama, kimo kya kupembelela mwaana walailwe? Akyu kyajinga kikwabo.

<sup>194</sup> Vulukai, badinga na Sodoma kunyuma kokwa; badinga na muluwe wabo. Kabiji Abulahama wajinga na Muluwe wanji.

<sup>195</sup> Abulahama wapembejilenga, juba pa juba, pepi, nobe kintu kyakonsha kubula kumweka. “Sala, na naite, kabiji aye aduleendi.” Mwayila mulaye wakwa Lesa, aye watwajijiletu na kupembelela. Mukachi ka bukajimbulushi bonse, aye wapembejilenga yewa mwaana.

<sup>196</sup> Nanchi ne waitabila wakine naye ukipembelelatu Mwaana walailwe amba abwele! Monai, mwaana kasa akyangye kufika, kwajinga kiyukilo kyapainwe kwi aye. Bushe kechi kiyukilo kya kwiya kwa Mwaana na kusololwa ku Lukunwa wabufumu wakwa Abulahama ao ubena kupembelela Mwaana Wabufumu,

byonka byo kyajinga kwi taata Abulahama ku mwaana wa ku mubiji? Abyo ibyo? Yesu waambile byobyo, mu Luka Wazhila 17:30, “Akye kimye kasa kikyangye kwiya ne,” amba “Mwaana muntu ukasololwa nobe byonka Aye byo aubile mu moba a Sodoma, lonaiko lwa Sodoma kasa lukyangye kufika ne.” Pano tubena kupembelela kiyukilo.

<sup>197</sup> Pano twayai tumone byubilo bya kimye nobe byonka byo kyajinga mu Sodoma. Monai, bonse baile mu musango wa Sodoma, ntanda.

<sup>198</sup> Nalanguluka umo utangijila bya mafilimu kyo abikile pa kipikichala, kechi papita kimye kyabaya ne, kabiji Naile na kwikimona, akya kyajinga, *Sodoma*. Inge wakonsha kwikimona kafwako kikwabo pa kyokya ne, ke kimonaitu. Ke kipikichala kyawama bingi kya ba United States leelo, Hollywood, byonkatu byo aji; musango umo wamvwajilo kabiji ne bintu byonse byo baubile mukyokya kimye; kutoma kukatampe kabiji ne bintu byonse, ke musango wabupopweshi bwabubela bwa bantu, batelwa-mba bapopweshi.

<sup>199</sup> Monai, kabiji Sodoma wajinga na kamonyi, kabiji wajinga mulunda wa jizhina ja Lota, ao wajinga mwipwa kwi—kwi Abulahama.

<sup>200</sup> Bino, Abulahama kechi waile mu Sodoma ne, aye ne jibumba janji ne. Aye wajinga na jibumba jikatampe, jafikilamo kulwisha jibumba ja mamfumu ne mazhita abo. Nanchi, wajinga na jibumba jikatampe. Kabiji waikele byobya mushi ya kinchi kya maoka, juba jimo, kimye binto po byabujilenga kwenda bulongo ne; kafwako nangwa umo wajinga na kyakuuba nanji ne, bino aye watwajijiletu na kukwachijila yewa mulaye.

Pano monai, pepi pepi, kasa tukyangye kushika ne.

<sup>201</sup> Kimye kyo aikele momwa, kwaishile banabalume basatu, baishilenga kwi aye. Babiji ba mwi abo baile mu Sodoma kabiji basapwijile Mambo awama kwi abo, akuuba mba balupukemo, kwi Lota. Abyo ibyo nyi? Bino Umo waikele ne Abulahama. Monai, awa Umo waikele ne Abulahama wajinga Lesa Ayemwine. Aba bakwabo babiji bajinga ba Malaika baluwe.

<sup>202</sup> Pano, monka mu Sodoma, kechi baubilemo byakukumya ne, kana konka kwi bampofula meso. Kabiji kusapwila Mamboawama kimye kyonse ebampofula meso.

<sup>203</sup> Pano talai pa kutachikwa kwa joja juba. Kuji kipwilo kya ku mubiji. Kimye kyonse mu bisatu, nobe byonka byo Naambile bufukwa bwapita, Lesa waimenwako. Kwajinga Bwinasodoma, Bwinalota, kabiji Bwinaabulahama. Kijitu mu musango umo bufuku buno, ntanda ijitu byonkabya.

<sup>204</sup> Lekai ne mwipuzheko kintu kimo. Talai pa ntachikilo ya kino kimye. Abulahama wamutelele awa Mwanamulume ye

esambilenga nanji mba, “Elohimu.” Akye kyambo kya Kihebelu kya *Elohimu* kyalumbulula mba “aye Umo wafikilamomubyonse, Umo Ye Wapeenape,” Elohimu, Lesa Aye mwine!

<sup>205</sup> Muntendekelo, Ntendekelo 1, waamba mba, “Muntendekelo Lesa . . .” Tolai kyambo kya Kihebelu popa, nangwa, kyambo kya Kingiliki, byokabyo, “Muntendekelo *Elohimu* walengele meulu ne ntanda.”

<sup>206</sup> Pano, Aye, mu Ntendekelo, pa 22 papo, Waamba ne jikwabo, nangwa—nangwa nobe pa 20, Waambile mba, kabiji watelele jizhina ja yuwe Mwanamulume mba “Elohimu.” Kika kyo ekyubijile? Lesa, waimejilweko mu mubiji wa butunshi, awa waikele ne Abulahama kabiji wajile nyama ya ng’ombe, ne kutoma mukaka, ne kuja shinkwa. Lesa Ayemwine, kabiji wazhimang’enetu ku meso akwa Abulahama.

<sup>207</sup> Bino Aye wamupele kiyukilo. Monai. Kabiji akya kiyukilo kyajinga mba Aye wavundamijile nyuma Yanji ku tente.

<sup>208</sup> Kabiji vulukai, Abulahama, jizhina janji jajinga *Abulama* mobaacheche kunyuma, kabiji Sala wajinga *Selai* panyuma; S-e-l-a-i ke S-a-l-a-h, kabiji A-b-u-l-a-m-a kwi A-b-u-l-a-h-a-m-a. *Abulahama* kyalumbulula mba “shanja byaalo.”

<sup>209</sup> Pano mweshai bulongo papo, kabiji tusakumona ntachikilo ya kimye kyo tubena kwikalamo, byonka Yesu byo etubujile mba tukamone kuntachikwa. Twamona byonse byashala konse konse; pano twayai tumone ku Lukunwa wabumfumu, ng’anyi ntachikilo yo bakonsha kumona.

<sup>210</sup> Pano awe Muntu waambile mba, “Abulahama, mukazhi obe ujipi, Salah?”

Kabiji Abulahama waambile mba, “Uji mutente, kunyuma Yenu.”

<sup>211</sup> Bino, Aye kechi wakimumwenepo ne. Wamuyukile byepi Aye mba jizhina janji *Abulahama*? Wayukile byepi Aye amba jizhina janji jajinga *S-a-l-a-h*? “Abulahama, mukazhi obe uji kwepi, Salah?”

Waambile mba, “Uji mutente, kunyuma Yenu.”

<sup>212</sup> Aye waambile mba, “Amiwa . . .” “Ami,” ke ng’ambilo yakutazha ku bumuntu. “Amiwa kakupepula mwaila mulaye. Mukazhi obe ukekala na mwaana. Obewa waketekela Amiwa, pano Amiwa nkekifikizha.”

<sup>213</sup> Kabiji Salah, wajinga mutente, kunyuma, kasa abena kuteleka kya bufyaafya nangwa telekelo ya bufyaafya, monse mo mwakosha kwikitelela, watelekelenga mu tente, wasekele mu muchima wanji, ne kwamba mba, “Pano, amiwa, mwanamukazhi mukote nobe Byonji, kwikala na lusekelo na nkambo yami; kabiji ne aye wakota, nanji, wajinga na myaka aduleendi? Bino, akye kechi kyamwekelepo pa yavula, myaka yavula ne.”

<sup>214</sup> Kabiji awa Muntu, M-u-n-t-u, waikeli popa nakuja, mu mubiji wabutushi, na kutoma ne kuja nobe muntutu; wajinga nalukungu pa bya kumvwala Byanji, kabiji wajinga na lukungu ku maulu Anji, kabiji Abulahama wilomvweleko. Lesa, Ayemwine, watajile kuzhokoloka, kabiji Aye waambile mba, “Kika Sala kyo asekela, kunyuma mu tente, pa kwamba *kikye?*” Aye wayukile mba, wakonsha kuyuka milanguluko yakwa Sala amwa mutente, kunyuma Yanji. Abyo ibyo nyi?

<sup>215</sup> Pano, kimye Lukunwa Wabufumu wakwa Abulahama byo aishile panopantanda, ng’anyi kiyukilo kyo Amwesheshe? Mwaana muntu. Shimona waishile kwi Aye juba jimo; Andeleo wamuletele. Aye waambile mba, “Jizhina jobe wi Shimona. Obewa wi mwaana wa kwa Yona,” Aye waambile. Mwamona, akya kyamulengejile kwikala waitabila.

<sup>216</sup> Filipa waile konka kabiji wamwene Natanelia, ne kubwela jibiji. Waambile mba, “Iya, umone Muntu Yetuji—ye twatana: Yesu mwina Nazala, mwaana wakwa Yosefwa.”

<sup>217</sup> Aye waambile mba, “Pano pembelako kamineti kamo. Mujipo kyawama kyakonsha kufuma tuyewa wakizha mu lupata nyi?”

Aye waambile mba, “Iya, umone.”

<sup>218</sup> Nanchi kimye Filipa byo aishile mu Kyeenyi kya Yesu, ne Natanelia, Yesu watajile pe aye ne kwamba mba, “Talai mwina Isalela mwabula nangwa bubi ne.”

Aye waambile mba, “Labbi, kimye ka Anweba kyo mwangyukile ami?”

<sup>219</sup> Waambile mba, “Kasa akyangye kukwita Filipa, kimye kyo wajinga mushi ya kichi, Amiwa nakumwene.”

<sup>220</sup> Aye waambile mba, “Labbi, Anweba mwi Mwaana wa Lesa. Anweba mwi Mfumu wa Isalela!”

<sup>221</sup> Kimye awa mwanamukazhi mucheche ku mushima, mu musango wanji wabubi, waishile, jishimikila jiji nobe bibye, na kutapula meema. Yesu watumine banababwanga Banji, amba bakalete byakwingijisha. Byo aishile na kutapula meema, Aye waambile mba, “Ndetelepo Ami byakutoma, mwanamukazhi.”

<sup>222</sup> Aye waambile mba, “Kechi kyafwainwa Obewa kwamba kyokyo ne. Atweba kuno tuji na misalululo. Pano, anweba Bayudeya kafwako kyo mwakonsha kuuba ne atweba bena Samaliya ne; atweba kechi tujipo na kya kuuba ne anweba ne.”

<sup>223</sup> Aye waambile mba, “Bino, mwanamukazhi, inge wayuka Ye ubena kwamba nanji, inge wangipuzha Ami bya kutoma. Nafwainwa kukupa meema akuuba mba kechi ukeye kuno na kutapula meema jibiji ne.”

<sup>224</sup> Aye wataine musango wa byubilo byanji byo byajinga, byo kyajinga. Aye waambile mba, “Yanga ukalete mulume obe eye kuno.”

Aye waambile mba, "Amiwa kechi nji na mulume ne."

<sup>225</sup> Aye waambile mba, "Obewa waamba bukine. Waikala na batanu, kabiji ne yuwe ye uji nanji kechi obe ne."

<sup>226</sup> Aye waambile mba, "Mwane, Nayuka mba Anweba mwi ngauzhi. Twayuka mba Mesiyasa byo akeya Aye uketumwesha byonse bye."

Yesu waambile mba, "Amiwa yami Iye."

<sup>227</sup> Pa kyokyo, wanyemejile mu muzhi ne kwamba mba, "Iyai, mumone Muntu Wambula bintu byonse byo Nauba. Bushe Awe kechi ye Mesiyasa nenyi?"

<sup>228</sup> Talai, Aye waubile kikye ku meso aba Yudeya, kabiji ne Benasamaliya, pakuuba kechi kuba Ngetila ne. Ba Ngentila, atweba bantu, twajinga batunshi mu oa moba, byaalo bikwabo, kasa twasenda bilubi mu nyuma yetu, na kupopwela bankinshi. Atweba kechi twapembejilenga Mesiyasa ne.

<sup>229</sup> Aye umwekatu ku bonka babena ku mupembelela Aye, kabiji atweba twafwainwa ku mupembelela Aye.

<sup>230</sup> Pakuuba aba baambile mba babena ku mupembelela Aye, kine kipwilo, byo bamwene kyokya, baambile mba, "Aye ye diabola. Aye ubulang'ana biji mu bumi bwa bantu, ye Zelebabuba!"

<sup>231</sup> Kabiji Yesu waambile mba, "Abwa bubi bukalekelwa mambo," mambo Aye kechi wakifwile ne. "Bino," waambile mba, "juba jimo Mupashi Wazhila ukeya kabiji ukooba kintu kimo, kabiji kwamba kyambo kimo kwi Aye kechi kikamulekelwa ne." Ajo ke jino juba, amo Kyambo kyonse kyakwatakanana pamo. "Kwamba kyambo kimo kyamyendeleko kwi Aye; kechi kikamulekelwa ne mu inontanda nangwatu muntanda ikeya."

<sup>232</sup> Awa wajinga Lukunwa wa Mubufumu wakwa Abulahama. Kabiji kuno ke yewa Lukunwa Wabufumu wakwa Abulahama, ao wayishile mambo a kokwa kwiyukisha kwa yewa Mwanamulume waikele kokwa ne Abulahama, waishile nakushinikisha amba ye Lesa umotu, walaile mu jino juba, "Byonka byokyajinga mu mooba a Sodoma, nanchi byobyo kikekala ne pakwiya kwa Mwaana muntu, byo Akesololanga Ayemwine nobe Mwaana muntu." Amena. Jino jo juba ja kikye Kinembelo kufikizhiwa.

<sup>233</sup> Monai ntachikilo yotuji nayo leelo. Talai ku kipwilo ako Mwaana wa Lesa... Talai mwekelo ya juba yabula kuwama. Talai pa byonse bya bungauzhi. Pano, kintu kyenyi, benyi betu bafikilamo, inge ntachikilo yafwainwa kwikala nobe ya mu Sodoma.

<sup>234</sup> Kwajinga basatu bayishile, banabalume basatu batuminwe kufuma Mwiulu. Atweba twakonsha kuswa kyokyo. Basatu bamwiabo; Umo waikele ne Abulahama. Bonse batatwile, bino Umotu waikele ne Abulahama. Bashala bayile ku Sodoma. Abyo

ibyo nyi? Kabiji Abulahama jizhina janji japiwilwe, kufuma kwi Abulama kuya kwi Abulahama. Kyakine?

<sup>235</sup> Kafwako nangwa kimye kimo kya jishimikila, kipwilo kya ntanda, kechi kwajingapo musapwishi waileko, na jizhina japelako na h-a-m, poso mu jino juba, Billy G-r-a-h-a-m. Abyo ibyo nyi? G-r-a-h-a-m, bisopelo sikisi. A-b-u-l-a-h-a-m-a ke bisopelo sebeni. Pakuuba G-r-a-h-a-m ke bisopelo sikisi, akyo kyaimenako ntanda, muntu. Mwamona?

<sup>236</sup> Monai baile kokwa, leelo, ke boba baluwe bafumine Mwiulu.

<sup>237</sup> Bushe pajipo muntu panopantanda wasapwila lulapilo bulongo nobe Billy Graham? Bushe pajipo muntu umo waubapo bintu bimo pa bantu, nobe Billy Graham? Kechi kwakikalako ne, mwaya ntanda yonse, muntu umo. Oo, Billy Sunday, kabiji ne bakwabotu, bajinga muno mu United States, bino Billy Graham wayukanyikwa ntanda yonse. Monai aye koabena kwichila? Kufuma mu Sodoma.

<sup>238</sup> Kabiji aye uji na bakukwatakana nabo kokwa na kipwilo kya Pentekosito, Oral Roberts.

<sup>239</sup> Pakuuba nga ku jibumba Jasalwa? Ng'anyi musango wakiyukilo kyo bafwainwa kumona? Kika kyo bafwainwa kwikala nakyo? Aleluya! "Kukekala Kyeya mu kimye kya mabaanga abufuku." Jino juba akye Kinembelo kyafikizhiwa. Jino juba mulaye wakwa Lesa wafikizhiwa. Twayuka kyokyo mba kya Bukine. Aye uji muno bufuku buno byonka byo Ajinga kyokya kimye.

<sup>240</sup> Bino, kwikisapwila, akyo Najinga nakyo kimye kicheche kyapita, inge wasapwila kintu kingi kabiji ke Mamboawama a Bukine, nanchi Lesa wafwainwa kushinikisha kyokyo. Bushe kyokyo kyakine nyi? Pano, inge kyaikala byobyo, lekai Lesa wanembele Kyambo, lekai Lesa yenka walengele bungauzhi, lekai Lesa uji Lesa wa Kyambo, eye kuno na kushinikisha mba Aye ukijitu Lesa.

<sup>241</sup> Nobe byonka Elaija byo aile pa mutumba; wamwenenga, Elisha waile na kumumona Elaija, aye waambile mba, "Amiwa nakeba bibese bibiji bya pa kibese kyanji." Kabiji awa mukukumba wajinga pe Elaija waponejile pe Elisha. Aye waile konka, kabiji watolele awa mukukumba ne ku mupuma pa mukola, kabiji waambile mba, "Uji kwepi Lesa wakwa Elaija?" Kabiji kintu kimo kyamwekejile Elaija, kyamwekele kwi Elisha.

<sup>242</sup> Kabiji Mamboawama amotu, abwa Bulume bumo, yeka Mwaana muntu umo wajinga keesha, leelo, ne myaka yonse. Bahebelu 13:8. Mwikiketekela nyi? [Kipwilo kyaamba mba, "Amena."—Waku.] Pano, Ne mwipuzha. Amiwa kuuba naikala Aye ne, bino Aye uji muno. Atweba twi bakusendatu.

<sup>243</sup> Anweba bantu bambo koko, mwakolwa ne kumanyikwa, anweba mwayuka mba Amiwa kechi ne muyuka ne, lekai Lesa

pano...inge Nakonsha kwi keepesha amiwa mwine. Lombai ne kwipuzha Lesa.

<sup>244</sup> Amiwa kechi nafwanyikizha ne...Kechi mujipo kitupa kya milombelo muno mu kishimikwa ne, mo kiji? Ine, Amiwa kechi...Atweba kechi twapanapo kitupa kyamilombelo ne. Atweba tukekala nambung'eno ya milombelo pa...nangwa kubuka bakolwa, pa kipwilo. Bino, anweba lombai.

<sup>245</sup> Kabiji mwayuka mba Amiwa ne mwenyi mwine mwine kwi obewa. Mwamona, wangyuka amiwa, Jeffersonville! Amiwa kechi keba bantu kufuma ku Jeffersonville kuba kyokyo ne. Nakeba bantu kufuma kuntu kungi. Mumone kana Lesa ukisolola! Monai inge Aye ukijitu pamo keesha, leelo, ne myaka yonse!

<sup>246</sup> Uba nobe mwanamukazhi wachepa mubiji byo aubile. Aye wapichile mukachi, ne kwamba mba, "Namuketekela yuwe Mwanamulume." Aye wajinga na lukatazho lwa mashi, kabiji waambile mba, "Inge Nakonsha kukwata kwapela kyakumvwala Kyanji, Amiwa naketekela mba Nsakwikalatu bulongo." Abyo ibyo nyi?

<sup>247</sup> Mambo a lwitabilo lwanji, aja juba, Kinembelo kyafikizhiwe. "Aye wakwachile muchima wa muntu walajika muchima, wabukile bakolwa kabiji ne bilema."

<sup>248</sup> Byo akwachile ku kyakuvwala Kyanji, kabiji waile na kwikala pashi, Aye waalulukile ne kwaamba mba, "Ng'anyi wajikukwata Amiwa?" Ng'anyi musango Aye ye akonsha kuyukilamo, mwavula bantu byobya, kapepo bimye sate kukila pa baji muno bufuku buno, biumbi byabo? Pano Aye wikiyukile byepi? Aye waambile mba, "Ng'anyi wajikukwata Amiwa?" Aye kechi waambile kyokyo mambotu a kwikyambatu ne; Aye waambile kyokya mambo kyajinga kya kine. Kabiji Aye waambile mba, "Ng'anyi wajikukwata Amiwa?" Kabiji Aye watajile posepose ne kumona mwanamukazhi wachepa mubiji, po aikele nangwa kwimana, musango yense ye ajingamo, wamubujile lukatazho lwanji lwa mashi amba lwapwa.

<sup>249</sup> Awa wajinga Yesu keesha. Ao ye Iye leelo. Mwaketekela kyokyo nyi?

<sup>250</sup> Amiwa kechi nakuyuka ne; Lesa wakuyuka. Bino uji na misongo ku lubaji lobe, akyo kibena kukushupa. Abyo ibyo. Obewa waikala popo na kulombapo. Bushe Amiwa ne mwenyi kwi obewa, kabiji twibeniyi umo ne mukwabo nyi? Imana, inge byo kiji. Amiwa kechi nakuyuka ne. Ke *yuwe* mwanamulume uji papo pa koona, awe mulunda mwanyike. Ne obewa uji na kikolomeno kyatama. Abyo ibyo. Ubena kulombelela pa kyokyo. Anweba bonse muji bingi na lubazhibazhi pa kintu kimo. Obewa usakusha mbung'eno mambo, obewa wi wamwingilo, obewa uji na mingilo yo wafwainwa kutanwako. Abyo ibyo. Uu-uu. Obewa waketekela mba Lesa wakuyuka nyi? Rev. Mr.

Smith, pano obewa yanga tambula lubuko. Yesu Kilishitu wakukosesha. Yanga ku mbung'eno yobe; kikolomeno kyobe kechi kikakukatazha ne.

Ng'anyi ye akwachile?

<sup>251</sup> Kuji mwanamulume waikala kunyuma *kukwe*; aye wakatazhiwa. Uji na kitumbwa ku jichima kulubaji lwa kipiko. Aye kechi... Aye kechi wakuno ne. Obewa wasebezanga ku mukochi. Abyo ibyo. Amiwa ne mwenyi mwine kwi obewa. Inge abyo ibyo, sukanya kuboko kobe. Kitumbwa kiji ku jichima ja kukipiko, kabiji obewa ubena kuya na kutumbulwa kukipatela. Abyo ibyo? Obewa kechi mwafuma kuno ne. Obewa wafuma ku tauni ungi. Obewa wafuma ku Virginia. Abyo ibyo. Obewa waketekela mba Lesa wakuyuka nyi? Mr. Mitchell, abyo ibyo, yanga ku nzubo wikale bulongo. Yesu Kilishitu wakukosesha. Mwipuzhai mwanamulume! Kechi namumonapo ne, mu bumi bwami. Wajikwikala popa, kasa alomba.

Jino juba akye Kinembelo!

<sup>252</sup> Apo paji inetu waikala kunyuma kukwe, kunyuma yami, nobe Sala byoajinga mu tente. Aye ubena kulombelelako mwaana wanji wamukazhi. Imana. Mwaana obe wamukazhi kechi uji muno ne; uji kwalepa, mwaana wamukazhi. Kabiji obewa ujitu pamo nobe byo kyajinga mwanamukazhi waishile kwi Yesu, wajinga na mwanamukazhi wamanyikilwenga bingi na diabola. Mwanamukazhi uji... nsongwakazhi wakwachiwa na demona. Aye kechi uji muno ne. Wafuma ku... Obewa wafuma ku Kabeta ka buyeke bwa Carolina. Mwaketekela kyokyo nyi? Kabiji akyo bo bukine, kechi ibyo nenyi? Mrs. Orders, wakonsha kuya ku nzubo. Inge mwakonsha kuketekela na muchima wenu yense, obewa usakutana mwana obe wamukazhi byo bamutaine kimye Yesu Kilishitu mu mooba apita kunyuma, waambile mba wabukilwe.

<sup>253</sup> Jino juba akye Kinembelo; kiyukilo kya Sodoma, kiyukilo kya Lukunwa wa kilapo, kiyukilo kya kipwilo kya ku mubiji! Jino juba akye Kinembelo kyafikizhiwa mukachi kenu. Bushe wikiketekela nyi?

<sup>254</sup> Anweba mwakonsha ku mwitaba Aye ponka pano kwikala Mupulushi ne Lubuko lwenu? Imanai, anweba bonse, ne kwamba mba, "Amiwa naswa lubuko lwami. Amiwa namuswa Aye kwikala Mupulushi wami. Amiwa namuswa Aye kwikala Mfumu wami." Anweba bonse imanaiko.

Jino juba! Telekai, balunda.

<sup>255</sup> "Aye watangile Kinembelo, kabiji wabwezhezhe Baibolo ku pulisiti, kabiji," ne kwamba mba, "meso onse a bantu ajingatu pe Aye. Kabiji Aye watajile pe abo, ne kwaamba mba, 'Jino juba akye Kinembelo kyafikizhiwa.'"

<sup>256</sup> Amiwa natanga Kinembelo, kiji na biyukilo nangwa biyukilo byavula byakwamba mba tubena kwikala mu mooba apelako, kisemi kikamona Yesu Kilishitu kubwela panopantanda. Kabiji Naamba kwi anweba bufuku buno, ne jikwabo, jino juba akye Kinembelo kyafikizhiwa ku meso enu.

<sup>257</sup> Anweba muji mu Tucson, anweba muji mu California, Anweba muji mu New York, pa kunungakanya-kwa mafoni, jino juba akye Kinembelo kyafikizhiwa ku meso enu.

<sup>258</sup> Twayai tusangalale ne kusekela, mambo Masongola a Mwanamukoko afwenya ke pepi, kabiji Musongwa Wanji... Musongwa Wanji winengezha kala Aye mwine.

<sup>259</sup> Twayai tusutuleko maboko etu kabiji ne kumupa lukumo Aye, anweba bantu bonse. Lesa emupeshe.



*JINO JUBA AKYE KINEMBELO KYAFIKIZHIWA* KDE65-0219  
(This Day This Scripture Is Fulfilled)

Ino Mbila na Mulongo William Marrion Branham, yalupwilwe patanshi mu Kizungu pa Kitanu mabaanga abufuku, 19 Kubomukata, 1965, pa Parkview Junior High School ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)